



ル 4
3098
12



高麗府志

拾貳

欽命巡視臺灣朝議大夫戶科給事中紀錄二次六十七

同脩

欽命巡視臺灣朝議大夫雲南道監察御史加級紀錄次范

咸

分巡臺灣道兼提督學政覺羅四明

續脩

臺灣

府

知

府余文儀

藝文四

賦

駢體

詩一

賦

臺灣賦

府學教授林謙光長樂人

有汗漫公子足騁八方目驚九鄙訪秦漢之故都登雲亭
之舊時舒神於錢來丹穴之顛長嘯於渾夕脫屣之址洞
庭彭蠡拍驚浪以颺飛弱水龍門鼓輕舸而容與歷吳越

藝文四

賦

駢體

詩一

角玉笋璀璨則漾素影于波濤金鑛嶙峋則仗雷聲爲管
籥計自南而訖自北繞以二十二重之溪由此界而溯彼
疆隔以六千餘里之谷升高而眺循俗而詢厥地惟鹵厥
土惟墳厥田惟上厥種惟糜厥艸惟茂厥木惟困厥珍惟
錯厥布惟芬厥鳥惟毳厥獸惟羣飛潛動植長盛紛紜嘉
茲壤之沃饒矧溫風之時至大吹雪以爲常龍興雲而不
曠邵溽暑于竹椰掃嵐烟于薤薜刺桐飄經歲之絳霞茵
蒼迎四季之夏氣歷選勝于炎方允莫方于海澨則有文
身番族黑齒裔蠻爛滿頭之花草拖塞耳之木環披短衣
而扯藤作帶蒙鳥羽而編貝爲屐歎中國異人之戾止乃
跳石越澗以來觀饋波羅之清冽獻嘉棧之甘酸蕉子剝

來幾等木桃之贈黃梨摘露不殊葵藿之繁翹首瞻依幸
彼俗之未陋跂足蠕動樂大化之可頌又有蓬跣方除膠
庠初隸載酒問奇負經請誦吟誦半雜于博勞衣冠尚存
其椎善拱手于都講之庭側身于敷教之地斯時也名邦
上客暫停輜軒廣布文德宏宣湛思數討叛之故開並生
之門示傲慢以秋肅導頑梗以春溫譬木鐸之徇路若指
南之啟昏從此登氣晴曠締結陞離之樓閣鮫人晝卧展錦
繡之乾坤謂非禹服重新湘侯甸要荒于一體堯仁遐被
輯躬栢蒲藪以稱尊也哉汗漫公子伏而聽焉茫乎喪于
懷不日不觀滄海者誇溝壑之宏不覩王會者託都邑之
鉅鄙人乃知今

皇帝之興圖未易以蠡測也請為歌以比于雅頌之末爰
起而系曰有土綿綿有水漣漣介在絕島吐霧吹烟

帝赫厥怒淵淵闐闐既昭義問乃命旬宣宗儒重道勿棄
蒙顛匪棘其欲式廓厥地

皇以溢之於斯萬年

平南賦

周 彭 晉 江 人

海氛煽虐數十年大將軍施公銜

命徂征一戰而克平南秦疏一編乃都人士家誦戶頌

積成卷軸也雖里巷微詞而輶軒足採乃據其事

實而作賦曰

繫

帝德之光華日聖神而文武光在 天殿仁風于率

土廣一廷之都僉舞兩階之于羽張百旅之熊羆扶于屯

乏羆虎六服率賓萬方安堵靡不稽首來王輪寶天府惟

是東南一帶溟渤奧區蛟鯨出沒陸梁連誅依龜鼉以窟

宅聚蜃蛤而為徒乘風濤以鼓鬣播毒燄于萑苻長使海

濱黔黎毀家破室雲屯士旅抱戈枕楛嗟桑田之萬頃乃

彌望而平蕪困頽魴于涸澤泣流鴻于征途錯烽烟于野

戍棲燐火于寒墟至于凄風鳴柝涼月啼鳥莫不含酸茹

感惻捨嗟吁

天子乃念南國之化儻每殷勤而宵旰口惟予股肱孰是

仗旄秉鉞為海邦剪此暴亂底四方于清晏僉日惟彼元

勳風膺寵眷俾控制以專征用克舒乎廟算 帝曰都自
江以南倚女爲屏翰其克奏膚功以靖此多難于是分虎
竹結龍章辭禁衛出 帝鄉雞豨夾隊魚麗成行戈鋌前
鏢旌旆飛揚駐雄師于澤國若雨集而箕張惟其地當斥
鹵井竭水漿喜甘泉之應禱供萬竈之餼糧乃脩樓船爰
戒舟航凌中流以擊楫攬形勢于滄浪先卜期以決勝奏
神策于廟堂繫重淵之瀾漫慨風浪之不常望蜃樓之經
緲嗟欲濟之無梁因而畫沙爲隄聚米成島孰漂疾當其
驚濤孰盤渦介其要道孰旁涯而可泊舟孰順流而堪立
搗敵已在吾目中胥按圖而可考定方略于金城羨充國
之計早知拉朽而摧枯胡險阻之能保爾乃乘機制變

月興師舳艫千里霄漢蔽虧劍氣干雲而爛熳甲光冒日
而陸離橫驚波以伐鼓撥瘴霧以揚旗各星羅而碁布聽
中堅之指麾因念蛟宮盤踞兔窟憑依旣蜂屯而蟻聚復
扼險而負危雖投鞭之可斷匪制勝之機宜故毀軍以驕
敵弄股掌之嬰兒彼乃疎汎守撤藩籬謂北來之軍旅豈
渡江之能飛橫千尋之鐵鎖沉水底以何爲于是鼓輕橈
浮彩鷁溯鴻波撼絕壁凌馮夷之宮搗潛虬之宅維時衝
颺怒號狂濤湍激飛沫瀆空滂湃瀚日吞海岳以俱真合
水天而齊碧百族爲之震驚千靈爲之辟易天吳排浪以
浮游罔象穿烟而蹙蹙篙一柁師逡巡踟躕莫不輟櫂停
橈驚心動魄爾乃精誠上格叱電驅霆飛廉頓轡屏翳潛

形波臣歡焉助順海若剡其揚靈爰散金以誓士恥與敵而俱生復焚香以戒旅惟妄殺之是懲于是乎軍聲震土氣騰臙腫發枹鼓鳴搖赤羽麾青萍殲怪鱷殪毒鯨弓不虛發矢必應聲倒戈漂鹵流血波頽旣獻俘而授馘遂掃穴而犁庭乘長風以破浪藉專閫之威稜因而傾其巢剡其壘敗甲殘鱗俛首帖耳濟藥石以扶傷俾瘡痍之咸起仗天威以縱擒使歸布其德意曰漏網之餘魂漫稱雄于井底將計日以成擒胡憑陵之足恃念薄海之含靈皆

聖朝之赤子無追踪于田橫五百人而俱死倘銜璧以來歸當茅土而錫爾惟公事之勾當何私仇之足恥彼乃籍戶口輸土田匍匐蟻伏稽首軍前曰南人不復反願稟朝

于堯天知

聖朝之寬厚必罔治于厥愆若夫哀鴻失所

頊尾堪憐延頸企踵霓望久懸瞻

王師之至止胥雀躍而

歡顏陳壺漿而塞野奉筐篚以周旋桑麻無擾井里依然耕不輟耒賈不易屨相與脫釜鬻之苦登維席之安更有流離遷客顛顛鬢弔天涯之魂影悲絕徼之風煙盼征鴻而帛書難繫吟夜月而笳拍空彈望鄉關于萬里長掩涕以流連欣撥雲而見日樂故土之生還乃復納叛招降編之部曲曰蔡人卽吾人務推心而置腹彼坑卒于長平何徒肆其殘酷化鷹眼以威馴各賣劍而買犢念勝國之宗支多竄身于窮谷懷禾黍之故鄉每悲歌而當哭俾白馬以賓王殷宗爲之不覆惟 聖世之芳規曠千春而並

燭于是雕題賁胸之衆燹齒臬矚之倫廻首請吏願列編
民遷情反志服教畏神固絕徼荒陬盡變爲樂土何殊方
異類共識乎尊親若乃威靈遠暨忝士忝臣陸贄水慄奔
走來賓琛幣重譯而交貢梯航接踵以並臻火齊木難之
寶珊瑚瑋瑁之珍鳥集鱗萃靡不咸陳豈中朝特貴乎遠
物乃遐方共聞有

聖人由是橈鼓傳于戈戢唱天山之歌勒燕然之筆交趾之銅旣
標淮南之碑亦立捷音騰發于閩關露布星馳于北極六合莫不騰
歡至尊爲之動色日海波之載揚四十年如一日吁嗟乎蒼生不
安于稼穡仗爾師貞一戰而克從茲殺運除劫灰熄樂桑麻恬
作息南顧紆憂云誰之力其速議褒封用彰彼勲德爾乃登

清廟播樂章告海邦之耆定慶社稷之靈長遂褒以絲綸
之 天語錫以黼黻之衣裳指山河而盟帶礪分茅土而
勅旂常謂爾元戎邦國之光用錫爾鐵券爾其世守而永
藏藉金城之萬里用屏衛此一方奠封隅以永固鞏奕葉
于苞桑追伏波之舊烈躡百世而流芳于是居者相與慶
于間行者相與歌于市胥朋酒以言歡賡吉甫之燕喜願
長借乎衮衣沾化雨于桑梓若乃鈴閣餘閒左圖右史吐
握下賢赤鳥几几門多珠履之賓座滿縫掖之士同雅歌
于祭遵等輕裘于叔子令旣肅于秋霜心復澄于止水彼
烟閣與雲臺知姓名之永紀備採風于輶軒詞罔逃于下
里乃歌曰嗟滄海兮噴狂濤蛟龍鬪兮虎豹嗥兵車絡繹

分饋餉勞悲中澤兮聲嗷嗷孰提師兮奮旌旄麾霓虹兮
製寶刀淬龍泉兮鷓鴣膏入蛟宮兮斬毒鼉斬毒鼉兮奠
滄海吁嗟偉烈兮斗漢爭高

臺灣賦

巡道 高拱乾

繫洪荒之未闢兮含混沌而茫茫迨河山之既奠兮爰畫
野而分疆裂九州而成天下兮誰不知乎海之爲百谷王
維禹功之所不及兮遂棄之于莽莽而蒼蒼一自地借牛
皮謀成鬼伎斷髮裸身雕題黑齒營赤嵌之孤城築安平
之堅壘隱樓櫓于鯤身蕪火攻于鹿耳貿易徧于三州資
生憑乎一水藉三保而標名兮致懷一以不軌哀商賈之
何辜兮聚魂魄于蒿里嗣是荷蘭煽虐天贊成功鹿耳潮
漲滄窟成空時移事去兵盡矢窮竄餘生而歸國兮遂此
地爲蛟宮非天心之助逆兮蓋劫運之未終不謂寇我疆
場焚我保聚時乘無備而肆其鴟張或因不虞而資其竊
取收亡命于淮南兮聚無良于水滸民不聊生

王赫斯怒咨左右之夔龍率東南之熊虎定百計
以安瀾兮果一戰而納土于焉擴四千載之洪濛建
億萬年之都邑風旣變爲新裁俗亦除其舊習文
武和衷干戈載戢誰肆志以行吟豈有懷而靡及
若夫狂瀾旣倒海若呈竒一時琥珀萬頃琉璃情
渺渺焉孤往天青青兮四垂風輕兮水面雲淡兮
山眉卽孤臣與孽子亦撫掌而忘機至于輝璧耀

奎陰陽分位月白飛銀空明捏翠乘舩艇兮小舟
結金蘭兮同志玉樹兮三章青州兮一醉實自幸
世外之有身誰復疑此間之無地又若山山含紫
樹樹青凝層巒疊嶂載月披星或瓊飛而皓皓或
體潔而盈盈時微雲以肆抹忽巧鳥兮一聲懷高
崗兮彩鳳聞此地兮仙靈羗應接而不暇又何讓
乎山陰爾乃石尤乍起馬首長驅雷鳴海底霧失
天隅濤倉皇而山立浪怒激而箭趨驚聞聲爲飛
礮訝入眼而墜珠乾坤兮雲狗風水兮人魚則惟
有寄餘生于泡影誰復望視息乎斯須若乃水土
無情番夷裸處旣慣狎鷗誰傷碩鼠雖敬老而尊

賢奈輕男而重女富賽懸壺糧無宿貯圍尺布之
蒙蒙謂衣裳之楚楚蛇目蜂腰雀行鳥語乃至鰕
鬚百丈鮑骨千尋貝文似鳳魚首如人大龜之壽
三萬歲蝴蝶之重八十斤非此邦之物產蓋在乎
南海之濱又如蜃樓縹緲海市高低碧雲擁口滄
海爲梯光從定後圓始天躋非此邦之風景又在
乎東海之青齊更或橋邊鼇泣別淚如珠山頭劍
舉雪城爲墟飛女仙之一石起剡史于沾濡扶紅
裳之魚女使之返于沮洳而茲邦又無此怪異或
見之于洞庭湖噫嘻戶滿蔗漿兮人藝五穀地走
風沙兮羣遊麋鹿厭五畝之宅而不樹桑兮任三

家之村而亦植竹道無遠近兮摩牽車牛人無老幼兮衣
帛食肉惟占籍而半爲閩人兮故敦厚亦漸而成俗若欲
盡寫夫杳渺之離奇兮恐或見嗤夫齊莊而端肅卽飲食
亦平易而無奇兮原未足以窮夫人問之水陸惟

聖世而能破夫天荒兮幸滄漠而亦擴其地軸搦管而賦
其物情兮用以佐夫大風之一曲亂曰秋風起兮楓木丹
天地閉兮荷始攤煥多寒少兮厥民析雷轟海發兮響空
山爲王尊兮應叱馭爲王陽兮心一酸于山則見太行之
險于路則見蜀道之難于海道之難上難險上險普天之
下望洋興嘆者吾知其無以過乎臺灣

臺灣賦

進士 王必昌

瀾瀾海于鴻濛環九州而莫窮覽形勝于臺郡乃屹立于
海中叢岡鎖翠巨浸浮空南抵馬磯北發雞籠綿亘二十
餘里誠泱泱兮大風爾其蒞東寧扼安平鯤身蟬聯而左
抱鹿耳蟠轉以右迤沙線沉礁迴紫瀾于曲港雷碾擺浪
撼赤嵌之孤城則瞿塘之峽不足擬又何論乎蜀道與大
行若夫市肆填咽阡陌縱橫泉漳數郡資粟粒之運濟錦
蓋諸州分蔗漿之餘羸蠶蛤魚鹽在在殷裕瓜茄薑芥種
種早生實海邦之膏壤宜財賦之豐盈溯夫天造草昧遐
裔荒墟南北土酋穴處巢居迨有明之宣德邊中官以乘
桴遭風偶泊始識其途嗣是以後狡焉啟疆實繁有徒魯
一本竊據于澎島林道乾勾致夫倭奴繼以思齊之嘯聚

荷蘭之詭圖汨乎鄭氏乃凌險而負嶼建僞官開方鎮萃
濱海之逃逋因利乘便順風長驅昭七郡破潮粵犯温台
掠東吳毒燄所觸沿海焦枯能躡四世虎視方隅維我
仁廟 皇靈震疊命將專征克摅誓懼遂按圖而設版復
定賦而計甲關四千載之方輿安億萬姓于畚鍤慶文教
之誕敷羣入學而鼓篋或挽車而騎牛或操舟而理楫重
洋開渡舸艦帆聯樂土嘔歌人民踵接蓋茲邦之廣衍兼
四省而延袤作南服之藩籬挺一方之奇秀其山則龍
省會五虎門東沿江入海徑渡關渥突起雞嶼峻嶒巖
過南嵌蠹龜嶮烟霏霧結繡錯雲屯大武雙高而作鎮木
崗特立而稱尊更有巍峨瑩徹如冰如雪是名玉山奇幻
特絕隨霽色而徧呈倏雲封而變滅若其磅礴蜿蜒駢羅
連蜷或如龜龍浮游于海上或如鸞鳳軒翥于天邊數六
六之羣鳥盼九九之危巔非人跡所能遍亦山經所未鐫
其水則原泉百派自東徂西九十九道之溜二十八重之
溪極潏迴以紆折迨放海而皆齊滂滂浹浹潏潏潏潏
汨汨涓涓疏畎距川大甲大安大肚之深廣蚊港笨港東港
之洄遊海翁窟風高浪湧虎尾溪水湍沙濺况黑港與白
洋更譎怪之萬千他如蛤仔難之產金寒潭難入毛少翁
之產磺沸土重煎赤山著木而烟起火山徹夜而光燃大
崗絕巘綴纍纍之牡蠣外海異香浮裊裊之龍涎山朝支
麓温泉沸鑊水沙連嶼藉草浮田茄老綱石湖穿海八里

全月窟湧泉又若鐵劍插于樹間十圍連抱藤橋懸于木
杪一線遙牽皆紀載之所未曾編乃林有鸛而無鶴山有
豹而無虎走獸飛禽蕃有茲土畫眉鸚鵡以白見珍彩囊
翟雉其文足取鳩候氣而鳴六雞應時而稱五倒掛夜棲
翻飛雷舞麋鹿祁祁麋鹿麋麋登山馬與野牛各成羣而
相伍若夫蠕喙之屬固難備舉風氣之殊亦可附著蟬未
夏而先鳴燕經秋而不去訝蜥蜴之有聲悵鸚哥之不語
蛩唧唧以夜吟竟四時之無序感物類而躊躇忽愴懷于
羈旅乃其海物惟錯獨爲充斥難悉厥名畧辨其色則鱈
烏鯉紅鱗紫鯧白赤海金精烏頰黃翼青鱗投火烏鰂噴
墨錦魴花鮫金梭如織又有香螺花蛤鬼蠍虎鯊白煙塗
魷麻虱龍蝦臺澎所產厥味多佳既漁于水亦樵于山楠
筍始生而合抱蕭朗高大而團螺屬野番所盤踞惜運致
之維艱至若山荔埔柿土杉水松赤鱗黃目交標九芎番
樹白樹之植悉雜出于中山猴栗象齒屋材最美蒜茶娑
羅名狀俱詭見鐵樹之開花愛仙芝之有子烏栽類取以
薪蒸綠玉遍插于庭凡數種刺竹密比石竹長板箭
竹如矢麻竹柔脆琴竹紋理卉木之花色色圖妍荷開獻
歲菊吐迎年桐繞春城而布錦梅放午天而擲錢繡毬攢
簇素馨蔓延貝葉之稱疑假曇花之種蚤傳番茉莉移來
異域七里香辟除瘴烟扶桑木出于東海水仙名託于臺
員厥艸惟天半是藥苗先春而發凌冬不凋惟內地之所

稀爰遍訪夫芻蕘水藤代韋而堅韌通草作花而妖嬈葉
張七弦聊充耳目之玩蘆開一捻可卜颺颺之颺更有番
茶作飲白麴爲醪齒草沈齒齒草漬毛羞草含羞老草老
饗若其刈莞蒲以織席編絲茅而索絢羣居萃處曾無慮
風雨之漂播果苾之實別種非一番樣熟于盛夏西瓜獻
于元日牙蕉子結數層鳳梨香闌滿室若菩提果波羅蜜
釋迦果金鈴橘尤中土所罕見而莫悉厥有檳榔生此遐
方雜椰子而間栽夾扶留以代糧饑餐飽嚼分咀共嘗婚
姻飾之以成禮詎諍得之而輒忘爲領畧其滋味殆恍惚
夫醉鄉爰稽習尚競事侈靡土沃民逸大抵如是逐末既
多本務漸弛工緘繡而棄棗營輕菽粟而豔羅綺羣尚巫
而好鬼每徵歌而角技思易俗以移風賴當途之經理蔣
集公績懋撫綏陳清端澤流遐邇茹冰檠以率屬則林荔
山之操履持玉尺以衡材則夏筠莊之造士又或留心風
物雅意典章孫司馬揮毫珠玉袁司訓積書宮牆皆有造
于斯土稱 盛世之循良若乃僧衣作賦沈文開萍踪坎
珂蝶夢名亭李正青塵緣叅破身寓公之清標足廉頑而
立懦况寧靖之闔室偕頌陳丑之傷親自沉永華之女懸
帛樞側續順之配受帶堂陰當 王化之將暨忠孝節義
已大著于人心故前有謝峻之妻矢死從一繼有方壠之
婦受迫不淫自是以來志載如林寧止五妃之墓宜表五
忠之祠足欽載考番俗約畧可紀罔識歲時弗知甲子以

月圓爲一月以稻稔爲一祀僅有生名從無姓氏贅塔爲
嗣隨婦行止凡樵汲與耕穫屬女流之所理乃其少長相
遭則側立以俟老病無依則相率周視比屋親睦或庶幾
乎仁里而其編藤束腰展足鬥捷貫耳刺唇文身爲俠聽
鳥音而下出佩大袍以利涉偶細故之睚眦驚野性之不
帖乘醉抽刀斷脰穿脇復有傀儡生菴鮮食茹血蒙頭露
目手持寸鐵伏林莽以伺人賽鬪體而稱傑且聞遠社畚
婦能作咒詛犯之卽死解之卽蘇喝石能走試林立枯傳
疑之語豈其然乎近郭熟番漸知禮制童子入學亦解文
藝壯者服役奔走更替類混沌之未鑿尚真率而無僞伊
昔吳越當周之時猶稱南夷卽在吾閩值漢之世亦屬荒

裔旣歸版圖遂號名都矧臺灣之疆域擅九土之奧區高
原下隰昫昫膾膾飲食往來衍衍于于合閩南與粵北昌
厲禁以爭趨保聚教誨亟藉良謨昌黎守潮子厚守柳風
行草偃何需遲久如彼荊州亦在島上文莊忠介後先相
望苟氣習之不拘豈人地之可量顧其地時震而海常吼
論者僉曰驚濤之溢湧幾視斯壤若等于浮漚不知地廣
而厚海深而幽其震其吼蓋陽氣不舒陰氣有餘之所由
惟開闢之未幾故節宣之未周方今風會宏敞 聖治廣
被久道化成百昌咸遂海不揚波地莫其位馬圖器車物
華呈瑞人傑應運而齊出矣謹就見聞按圖記輯俚詞資
多識愧研練之無才恭採摭之未備聊敷陳夫土風用附

不一各立土酋棲息于巉岬之隈往來乎嶠峒之陡或交
易而相招或梗化而難馴吸腥衣毛如在葛天之世匿岵
藏穴何知伏波之糾但見歸林之鳥翻飛而迅疾綠木之
猿連臂而攀捩鹿麀狝犢牝牡交匹翟雉鸛鷺雌雄羣率
竒獸珍禽多爾雅所未箋嘉樹雜植更山經所難述時而
氣和風暖極目晴岡野花爛漫而獻錦羣葉葳蕤而散芳
蒼岵懸溜挂千條之瀑布寒谷生春綴萬朶之紅粧斯阿
映所以不返而郅詵于焉停輻時而歌奏解慍興發遙岑
輕霏散而卉木森重靄合而巖壑深古洞納涼石室藏陰
鸞鳴牛嘯時聞叔夜之嘯蟬吟空谷恍操伯牙之琴時而
金風飄兮瑟瑟白露溥兮泠泠長天雲歛遠岫烟凝蛩聲

喧落木之野猿啼徹山戍之營惹幽閨之長恨動遷客之
離情時而陰飈盛兮結鼻巖氣凝兮裂唇千巘呈碧萬壑
堆銀凍碧澗之潺湲露白石之嶙峋淚步兵兮滿袖泣楊
子兮沾巾緬時序之遷流兮見風物之轉徙雜盛世之休
嘉兮器車出于嶢嶢聞飛龍之有神兮世咸沐其沾被降
時雨而興雲兮實山靈之錫祉仰良止之不遷兮宜千秋
而禮祀爲海東之砥柱兮亘萬古而永峙

臺灣賦

臺灣
舉人陳輝

乾坤闢而坎位定二氣合而水德成瞻茲臺海涵濁漱清
神灑沆瀣漾漫漫溱泓洪濤噴薄浸鯢身而浮澎島洄漩曲
折入鹿耳而滙安平灌百川而弗溢注萬壑而不盈爾其

激浪湧波爲潮爲汐藏蛟螭于深溝隱鼉鼉于巨宅其遙也望之而愈杳其廣也量之而莫畫旣地勢之偏傾歎神州之遠隔蓋禹功所未及敘章亥所弗能核迨夫交趾之石一鑿甘棠之港遂融昔在版圖以外今歸邦域之中東寧啟宇鄒魯成風憑一葦之所屆乃無遠而弗通南連廣粵北接齊吳歷錦蓋涉遼都藉片帆以利濟取水道爲便途于是賈人遊客飛艇揚航發鷺島渡重洋或候風期而停棹于西嶼之滸或隨潮信而齊泊乎赤嵌之旁萃諸州之珍貨遷本土之稻饍旣車書之一統何彼界與此疆則有瀛壖蛋戶世外自別依船爲家販海作歡任風波兮去來布漁火兮明滅施罾罟于鸞洲投絲緝于鼇穴生斯長

斯兮自幼至耄爾乃探龍宮數水族卯育胎生細肌豐肉鹽堪作鮚鮮可佐穀小者若蟻封大者若陵谷奮鬣兮閃風噴沫兮飛瀑乘怒潮以上下倒狂瀾而伸縮乃其怪形奇類種種堪噴角燕拖舟僧魚似人虎蛟擺浪龍鯉吞輪常衝突乎黑水時漂泳于澎津別有滂汙斷港葭葦蒼深輕鷗忘機而翔集振鷺脩儀而來臨游戲乎廣淵之浦棲宿于浮嶼之岑物色兮生意徙倚兮行吟若夫玉宇方澄冰輪乍陟石尤歛聲馮夷屏息飛白銀兮波光萬里濯素練兮水天一色泛輕舸于鏡中發清歌于舷側覺宇宙之甚寬恣遨遊于八極如或海若奮威天吳作祟驅崩象舞巖巖雪濤四起兮莽縱橫以紛飛濁浪千層兮排長空而

怒肆聲裂百丈之冰峒勢奔萬匹之鐵騎歷島嶼兮若崩
 掀樓船兮將墜骨巨險以往來仗忠信而無偽值鯨波之
 不律兮識放勳之廣被慶安瀾之若茲兮念端居之可恥
 善飛廉以先驅兮吾將展宗愨之素志果舟楫之具備兮
 若濟巨川自今以始

海吼賦

巡臺御史 張 涓

環臺皆海也自夏徂秋颶風屢作驚濤溢漏雷响
 電焯擊于鯤身厥聲迴薄遠近相聞莫不錯愕主
 人索居海濱形隻影寡潦積庭閒雨昏燭炮起坐
 聽之晝夜不舍惘然罔然若置身曠垠之野有難
 乎為懷者乃作海吼之賦其辭曰

緊天風之欲怒作地氣以先聲通呼吸而互應混上下而
 相成斜景黯其晝伏斷虹起以宵橫帆檣集鳥沙磧凌城
 鯨甲振厲鵬翼長征風搏九萬分扶搖直上水激三千兮
 不平則鳴雨乃炎蒸絺葛潤逼柱礎海若頻驚石尤頓阻
 猝展颶颶以迴涼怪雨淫淫而去暑蕭梢林木聳萬壑之
 秋聲破碎虛空競于村之社鼓其為壯也較鞦四起蕩瀾
 八垠冰峒崩裂鐵騎羣奔掄金鏞于山谷擺雷碾于乾坤
 其為駭也鼉鼉馭逐鼉屬連屯天吳奮以叫號罔象詭以
 遊巡門饒蛟而水立哮虺虎而林昏于是經旬陰曠徹夜
 喧漚淵宮久闕貝闕沉埋飛滂霧積峻湍山顛嗟樓船之
 屑沒絕商旅之往來淼淼龍津浮萍蹤其何託啾啾鬼哭

出魚腹而與哀則有域外孤臣天涯羈客長簾淒其短檠
蕭索枕繞瀑雷牕縈濤雪帳落葉于始波感吟蟲于將夕
愁泛宅之杳茫憶弄潮之夙昔徒撫影而徘徊或隨聲而
嘯咄爲之歌曰風漸澀兮動羅幃雨淋浪兮暑氣微長鯨
吼兮水四圍夢魂驚兮不可歸望無極兮音塵稀指故園
兮孤雲飛

駢體

平臺灣序

沈光文

臺灣遐島赤嵌孤城門名鹿耳鎮號安平未入九州之分
野星應牛女同躔不載中國之輿圖地與琉球接境自有
天地生此人民粵若洪荒擴斯世界長亘兩粵之前屹立

七閩之外東南則日本之舳舻常通西北則會稽之關梁

可數海壇滄水

山即舟

北向之方隅南灣銅山西流之門戶

邇連呂宋遙望暹邏爰有紅毛覬覦斯土乃分族類盤踞
爲巢坵要則雄建雙臺禦侮則高陳百砲問渠出處屬咬
嚼吧之分杪溯彼源流實荷蘭國之故種旣謀作窟復構
經商土番悽懂役使由人通事夸傲奸回憑已編氓僑寓
初來不滿千家賈客私行後至緣貪百貨俯嗟異域聲教
難通曠覽殊方性情各別天念民瘼淪身溟海地隨氣轉
假手延平此固天時之將漸移而善也乃俾鄭僞之先爲
開其端耳初己亥之歲延平揚颿出海撥艚橫江戈搗于
鐵甕之南艦係于金陵之北童叟怵遭屠戮捨地呼天婦

臺海府志 卷二十三
女強被奸淫病心切骨惟人非濟美不遇舟乘風便故爾
傳刃東吳士豈央髦只因海與江連遂得遊魂三月大軍
一戰小醜全輸死於山者山變其色沉於水者水斷其流
片帆折櫓望海興悲爛額焦頭栖身無地金門寸土未足
謀生厦島丸城奚堪錮口辛丑四月鄭成功奮命臺灣竟
奪其地而有焉世傳三代年歷世三其主若輔者苟有中
人之資誠作久長之計

天星大度上國鴻慈未有不啓其更新之路而嘉其向化
之心如此而十年生聚十年教養亦可以爲島上之酋而
比中原之一郡也何以言之鄭成功之攻克臺灣也兵民
潛伏上下悚惶雕題黑髮之夫跳梁不敢鑠耳文身之輩

蠢動無聞其地之近者南社二林新港蕭壠日加溜灣到
咯囉麻豆大武壠諸羅山其地之遠者阿里山奇冷岸打
貓社大居佛他里霧猴悶柴裡斗六西螺東螺麻芝干馬
芝遴大突半線大肚亞東大武郡南北投牛罵貓霧揀蓬
山大傑嶺加六堂小琉球卑南覓新港仔竹塹南嵌雞籠
淡水里有文賢仁和永寧新昌仁德依仁崇德長治維新
嘉祥仁壽武定廣備保大新豐歸仁長興永康永豐新化
永定善化感化開化諸里坊有東安西定寧南鎮北四坊
承天爲舊設之府東寧乃新建之名嶺後嶺前間閩接地
舊渡新渡舸艦聯雲彼海澨之風雖殊而性善之理則一
由是首崇文廟次葺祠宮歲脩禋祀時奉壇墮因誓從乎

其鄉且適合乎其野種竹以爲牆葺茅以爲屋漁樵樂業
耕稼乘時駕津梁於二贊之間溪深緩步屯竹木於大月
之港路仄安行鯽魚潭可饒千金之利打鼓灣能生三倍
之財曝海水以爲鹽燕山林而爲炭觀音山疑是落伽分
瓜雙壑竹想從淇澳移來北線尾夜靜潮平月沉水鏡下
港岡春明谷秀樹綴紅粧中樓仔環繞輕烟桶盤棧低縈
淺霧諸羅山臺北崇關似經巨靈之手直劈半邊鹿耳門
海中要地如戴高士之巾微有折角鳳山蔥鬱層巒疑丹
鳳之形猴悶哈啞疊嶂穿獼猴之穴七鯤身結萬山之脉
三茅港滙湍水之宗洋則分大獅小獅岡則有上港中港
月眉池旣標美號鳳尾橋更著嘉名赤山仔色燦丹霞鳥

樹林茂播青浦大橋居首而近郭竹港處遠而在南東崙
社山藏金礦下淡水地產硫磺陰峯突聳雲霄盛夏寒留
積雪陽谷窈含煜燿三冬暖若長春至於山培樑棟之材
僊謁芝蘭之秀檉楠可以支厦柴柴足以成舟薪蒸滿谷
松藤在林榕陰蔽日芷葭盈汀梓栗之樹更多橘柚之園
甚廣西瓜蒔於圃者如斗甘蔗毓於坡者如菘瓠蘆彷彿
懸瓠薏苡依稀編珠瑳異味椰瀝奇漿龍眼較庚嶺尤
佳荔枝比清漳不足枕椰孤樹草蓼叢株檳榔不直榦叅
天篔簹竹到根生刺天桃四時皆灼芳梅五臘咸香沼浮
荷而經年艷艷菊繞徑而累月芬芬茉莉編簪芙蓉挿障
來避早熟番薯遲收黍栽陽陸稷植雲疇豈分夏白秋白

穀區埔黏快黏蹲鴟掘以療饑黃梨熟以解渴菜種不一
藥類還多獸則麋鹿成羣而虎狼絕跡禽則鷹鳥逐隊而
鴻鴈靡翔龍潛遼壑龜息深潭大滬之鱗鱉鯉鯢所夕烹
鮮小温之蛤蚌蛭蚌富恒饌海上之鱗未能枚舉潮中
之介難以名稱網捕土鮑鈞引海翁淮南之鬪虎未是稀
聞温嶠之燃犀猶爲淺見珊瑚玳瑁購之雖易而取之亦
難貝錦珠璣小者恒多而大者實少及言乎其俗也濱海
之家大約捕魚依山之族惟知逐鹿伏臘歲時徙矜末節
冠婚喪祭爭好虛文病則求神而勿藥巫覡如狂貧則爲
盜而忘身豺狼肆毒變童若女傳粉塗朱少婦常耕蓬頭
跣足及言乎其性也慈祥愷悌先天似未生來禮讓謙恭

後進何知力學有勢而父子方親多財而兄弟乃熱情雖
未善人孰無良考乎其尚也鬪雞走狗搥鼓吹簫俳優調
長夜之聲琵琶譜娛心之曲綺襦絛袴炫五彩之衣裳公
孫蹙頰顛覆荒湛造中山之麴蘖高允攢眉習尚雖殊風
教可一考乎其候也一天澄徹四序清和暑無揮汗之淋
漓寒無裂膚之凜烈入夏定霑霑雨經秋始隸浮雲山氣
燠而難蠶海風颯而罕鵲若地則無時而不動若山則無
日而不青氣候不齊疫癘常作至於幅幘之廣大也道里
之延袤也南路通計五百三十里其詳則起自赤嵌城南
行一百四十里赤山仔八十里上淡水二十里下淡水十
五里力社十五里茄藤社六十里放線社八十里落加

堂一百一十里瑯瑯北路通計一千三百一十五里其詳則起自赤嵌城北行四十里新港社五十里麻豆社九十里諸羅山一百里他里霧一百二十里大武郡六十里半絲一百一十里水里社三百里大甲社一百四十里房里社一百三十里香霄社一百三十里後壠社二十里新港仔四十里中港仔一百里竹塹社二十里眩眩社二百里南嵌八十里八里全社過江十五里淡水城三十里奇抱龜崙社六十里內雞州六十里大屯社四十里小雞籠跳石一百五十里金包里外社十里金包里內社跳石二百里雞籠頭過江二十里雞籠城以外無路可行亦無坂澳可泊船隻惟候夏月風靜用小船沿海墘而行一日至山

朝社二日至聆仔難二日至哆囉嘴三日往直脚宜以外則人跡不到矣是則臺灣一島其幅幘道里如此其民情土俗如此其山川出產又如此苟革而於

天朝傾心於正化豈非蠻荒膏壤詎禍心不悛戾氣嘗橫大理昧而不知人事違而強作恃此彈丸黑子之區浪作窺天瀾海之想屢侵潮惠頻犯漳泉蹕臂當車良足嘆也乳犬搏虎實可悲耳壬寅年成功物故鄭錦僭王附會者言多諂媚逢迎者事盡更張般樂之事日萌奢侈之情無饜橫徵浪費割肉醫瘡峻法嚴刑壅川弭謗主計者所用非所養矣所養非所用矣世風日下人事潛移甲寅之會不觀時勢輒欲猖狂八千子弟既非訓練之師三五么麼

誰是運籌之客庚申二月全軍覆沒埋首臺灣舉國驚疑延頸內地加以旱暵而米珠薪桂地震而川竭山崩芒芒黎庶口不聊生辛酉鄭經奄逝齊桓橫尸而未殮繆肅抱子以號廷頓顛欽舍正直監國矯益西廊襁褓克城鄙齟稱藩妄尊東殿福建總制姚少保偵知陰事密請南征先行秘劄暗通內應之關繼遷飛盧大建

天威之討兩提九鎮會議溫陵巨艦長艖進屯鷺島

朝廷廟謨宏遠勝算周詳特簡提督將軍侯施琅督理舟師專征海宇將軍六韜練達三畧精微海壘形勢素燭于胸中島嶼虺蟄久運于掌上三年習戰惟乘一日之機百計求賢盡獲爭先之士康熙二十二年歲在癸亥六月十

四日銅山開駕十五日進兵八罩澳十六日薄伐澎湖部曲虔劉三奇合戰縱橫轉鬪七變回艖十七日舟停八罩澳十八日進取虎井桶盤嶼克之十九日將軍私乘舩艇臨波江洋親觀壁壘遍察機宜賊衆星羅碁布魚麗聳屯將旗鉞而莫及欲鞭腹以云難二十日二十一日將軍紼雜閱寂鈞令森嚴誓師以決勝而後行直效淮陰背水鞠旅必合權而後動遂同祖逖凌江二十二日分兵進勦東畔直入雞籠嶼西畔直入牛心灣中央大船分爲八陣一陣三疊將軍調度居中萬頃聽提柁之鼓徂征首出于檣闌浴日之波其左則興化鎮吳英金門鎮陳龍銅山鎮陳昌其右則平陽鎮朱天貴海壇鎮林賢廈門鎮楊嘉瑞提

標中軍羅士鈐命蘇黃石蘊藉陰符策定於樽俎之間蛟
騰霄漢謀合於孫吳之訣鵬舉扶搖履險如夷泛渤海之
蒼茫道遙止水滅此朝食振擘燁之武畧剪撲妖氛海眾
分駕砲船趕繒船洋船烏船四百餘隻蠡起前來其洋船
烏船之大也動載以萬斛計其砲船趕繒船之小也亦載
以數千斛計船頭安紅夷銅砲一位重輕不等巨細難重
十尺未爲至大百鈞却止尋常南邊發碩砲二十餘門鹿
銃二百餘門舳艫相接火矢交衝烟似昏霾旣風驚於塔
驢鏑如落葉更箭重以飄零自及至申戮力攻殺士逞敢
死之心將奮先登之志擊沉賊砲船八隻焚燬烏船三十
六隻趕繒船六十七隻洋船五隻火船因風迅發燒海島
船趕繒船三隻其餘船隻畏火分散漂泊無踪兇黨披靡
左右失支吾之序榜人委頓參差淆進退之方自焚砲船
九隻烏船十二隻因挽獲賊烏船二隻趕繒船八隻雙蓬
船二十五隻焚殺偽將軍二員總督統領提督總鎮先鋒
四十七員協營翼將大小等官三百餘員賊夥一萬二千
餘眾僞武平侯劉國軒乘小快船從吼門而逃其在山僞
將軍提督并大小等官一百六十五員俱帶眾投降矣交
鋒之際平陽鎮總兵官朱天貴被傷陣亡水陸官兵陣亡
者三百二十九員名執銳披堅未斫鯨鯢而獻誠獮飛電
擊先蒙矢石而捐軀帶傷者一千八百餘員名拔矢啖睛
夏將軍之勇也敷瘡刮骨關壯繆其神哉當年赤壁之兵

乾坤變色然江流夾岸相隔非遙疇昔鄱陽之戰今古驚
魂然湖水微波能高幾許是澎湖之役也殆皆天授夫豈
人謀粵稽往古澎湖六月未飄五日之和風遍訪居民斥
鹵卑塗罔汲千人之淡水樓船濟濟鎧甲鱗鱗九日洋中
風催後軸八旬島上麓湧甘泉豈非地轉而將善也海歸
一統之洪圖故得天靈而效順也民實

皇清之赤子劉國軒雖稱海將却善知機鄭克塽乃在童
年幡然幹蠱軒奉書函敬曰澎湖之役固知天命壞投印
象虔云臺灣之衆惟願歸誠將軍繕密奏之章具聞其事
皇帝沛好生之德卽允其行官則仍歸錄用兵則悉任歸
農八月十三日將軍侯旌懸赤嵌雷震安平宏宣授錢之

盛廓清蟻穴暫定三章之約循拊鴻哀白叟黃童方欣
口男耕女織始慶堯年煢煢異地之離人言歸桑梓蚩蚩
沿山之土著悉奉章程民無湯火之憂血氣通通於鬼國
地入版圖之籍車書遐逮於蠻陬卑南覓七十二社直脚
宣三十六卷羊之質虎之皮委蛇稽類人之面獸之心次
第輸寶於是立府立縣治茲黔首設道設鎮釐兩東方唐
韓愈之治潮陽愚頑講學漢文翁之守巴蜀巷伯興歌從
此闡明文教媲美名區是一十四省之外再加外海於五
十七縣之中又增三邑自古以來山河之廣遠疆域之遼
闊未有如今日者也猗歟盛哉猗歟盛哉
聖天子在上海不揚波德其溥矣大將軍柔遠重譯來歸

功實懋焉

客問 六條

諸羅 季麒光 無錫人

僭號承天東寧錫宇乾坤東港華嚴南島近接澎湖遙分
 哈喇荷蘭起之琉球倚之北憑甌閩西距交廣屬揚州之
 公隸女虛之疆外環大海雲漲煙平內阻重山沙迷霧列
 中有平原可耕可牧滄水長連崑流交峙呂宋之估駟時
 集日本之夷舶常通南澳銅山風檣可接海壇東埔飛葦
 直前蛟龍蜃虺兕豕鯨鯢隱隱云云沉沉莽莽遏雲怒風
 轟雷遁雨故海山之僻壤亦宇宙之奧區

木岡大岡以分南北前嶺後嶺以界東西鹿耳當海外之
 咽喉半線為內山之鎖鑰鳳山則葱鬱宏開猴闕則離奇
 盤結赤山鳥山上港中港鉤巒搏突攔捩呀至若斗六一
 門攀絨鳥道傀儡山曲折羊腸觀音志如來之勝蹟鬼仔
 實魍魎之淵藪草目瑯嶠迤南巨嶂雞籠竹塹極北重關
 奇嶺之雪峰萬仞南日之烟嶂千尋大武壠大傑嶼小琉
 球小雙寮皆疊岫參差連岡撼戛阿猴林障蔽頑峯哆囉
 囉交蟠遠社龜龜佛龕雙標天半猫羅猫霧接峙雲中雞
 心石門蓬山後壠重洋底柱攬浪搏潮觀關蹠戶當者失
 據

東寧之地惟水是衛淡水江北注之津梁濁水溪南來之
 門戶鹿耳門衝突海口大線頭高據沙洋雞籠城下颿指
 閩安琉球社外舟通呂宋至如北線尾中樓仔夜靜潮平

海翁窟歐汪溪春明浪秀政港笨港新港後港竹滬三林
或依山回互冒沒騰流或聚石奔衝昂澎浦溢千里雷馳
萬潮雪湧七鯤身毗連環護三茅港滙聚澄泓路分東渡
西渡洋別大鄉小鄉鯽魚潭打鼓灣漁舟雲集洲仔尾瀨
口港鹽格星屯扼其要可以制患資其利可以裕民

鹿之生也或斑而文或鷲而黝忽散忽聚乍往乍來於是
弓矢殪之鏢棚擲之罟穽伏之鉛礮擊之肉堪調羹角則
成膠皮毛捆載外洋是資牛之來也千百爲羣憑凌谿谷
聚飲則涓源爲涸迴食則蔓草皆楮閑以圍棚制以鉤盾
百步就羈以耕以駕至乃犬能攫羆羊可燔羹朝飛之雉
倚草棲林夜嘯之猿依山緣木豹文隱霧兔窟藏烟若夫

大縉斷流脩縵橫海魴鯧鯉鯉蛤蚌挽青猊之鬣截
白龜之皮搜龍籍羅蜃府莫不布雕俎就齏切具揉五味
腥膏饜飫

重山之中產有異材工師操斧匠氏持柯楠榕杉樟桑柏
槐柳莫不枝覆層岡幹依連麓舒目而望之青茅白葦紫
橐蒼蘆鬱若深林叢如列嶂代瓦以覆易牆以圖至如棧
柚之茂葉翳日檳榔之脩幹叅雲蕉擅綠天荔垂朱實山
則不童地鮮不毛土之良也

墳墟斥鹵五穀是滋以稼則蕃以種則碩水耕火耨不營
而足上地可七下地可三宜杭宜稻宜菽宜稷禾秫赤秫
早占晚占秬黍蘆黍紅秫白秫豆分黃綠麥別大小莫不

纍纍淋淋顆顆的的既篋滿等汚邪滿車黃雲紅玉相積
陳陳於是牛馬運之舟航載之以徵以貢和鈞兵卒家有
稼穡之利人有作甘之用

孫司馬元衡赤嵌集序

翰林院 萬 經 編脩 人

中原地盡媧皇之補無功絕島天浮精衛之填奚術沃焦
賜谷茫茫蜃市蛟宮弱水扶桑汎汎蠻人龍戶田橫已逝
血積蠻花徐福不歸啼聞瘴鳥蓋臺灣郡者歷代聲教所
不通前王版圖所未隸也

聖朝化行率土威被無垠繫渣滓之乾坤雕題入貢闢鴻濛之日月
卉服來王城列赤嵌官紆黃綬則有龍眠才子孫楚名流岸幘澎湖
諭裸邦以禮樂揚於活壤變斤鹵為桑田而乃藉畝勸農之餘偏工

體物格陰聽訟之下不虞絲竹滲泉慮以為言揮八極而
成韻華詞璀璨擷珊瑚之千枝異采焜煌落鯨珠之百顆
是則穎川渤海儒術斐然開府參軍風流卓絕矣豈若鬼
園挾冊者課吏治而迂疎鳳尾批箋者薄聲詩為小道也
哉且夫夸陳山海縱壯浪而難工雕飾禽魚每形容而易
儻若其留不盡之響於言外狀難名之景於目前大言小
言亦騷亦雅倒天潢而屈注百谷皆鳴持月斧作文斤五
兵非利耳淒目駭性寂情移將使子厚柳州未足記其巧
坡公海外無以喻其奇此赤嵌詩集為人間未有之書而
漁洋先生有創獲必傳之語也嗟乎吟篋隨身錦囊貯句
苟非好事未易言懷至於挂席隨雲乘風破浪問程孤往

歷鳥樹之迷離擊楫還歸與鬻帆而上下鯤魚夜吼則直
鬼輟吟颺母朝翻則爰居屏跡鐵沙排劍迴車九折非難
針路飄萍擊水千盤似夢而使君乃柁樓舒嘯官閣援毫
海月鑒其呶唔天風助其激盪捧函色動不數木華賦海
之章掩卷神飛勝讀郭璞遊仙之句感瓊瑤之投贈媿綠
糝之歛揚宜播雞林共貽鷺羽

詩一

題澎湖與

施肩吾

唐時人

腥臊海邊多鬼市島夷居處無鄉里黑皮年少學採珠手
把生犀照鹹水

普陀幻住菴

懸磬飄出半林聞中有茅菴隱白雲幾樹秋聲虛檻度數
竿清影碧窓分閒僧黃茗能留客野鳥吟松獨遠羣此日
已將塵世隔逃禪漫學誦經文

感憶

暫將一葦向東溟來往隨波總未寧忽見游雲歸別塢又
看飛雁落前汀夢中尚有嬌兒女燈下惟餘瘦影形苦趣
不堪重記憶臨晨獨眺遠山青

贈友人歸武林

却有機緣在相逢意氣同來看雲起處共話月明中去去
程何遠悠悠思不窮錢塘江上水直與海潮通

望月

望月家千里懷人水一灣
自當安蹇劣
周章處
常有好事
顏用陶詩句余常因用之
旅况不如意衡門亦早關
每逢北來客
借問幾時還

歸望

歸望頻年阻徒歡夢舞斑
在原嗟鳥散杖策效鱗攀
鏡裡頭多白風前淚積殷
用堅饑餒志壯士久無顏

偶成

最是貧來韜迹宜強爭
衲鑿竟忘癡客窻詩苦囊兼澁
旅夢春濃老不知失意無成知
得少灰心已久望燃疑生嫌
豈獨劉惔妹難笑
東山揜鼻時

曾則通久病以詩問之

予固今能詩恨其多臍耳豈疑聖人徒
乃踵吾家美買藥則無錢受饑偏不死
揮毫但苦吟應卽霍然矣

夕殮不給戲成

難道夷齊餓一家蕭然羣坐看晴霞
煉成五色奚堪煮醉羨中山不易驗
秋到加餐憑素字更深吸露飽空華
明朝待汲溪頭水掃葉烹來且吃茶

巳亥除夕

年年送窮窮愈留今年不送窮
且羞窮亦知羞窮自去明朝恰與新年
遇贈我椒樽屬故交頻頻推解爲同胞
客路相依十四載明年此日知何在脩門
遙遙路難通古來擊楫更誰同也憐
妻空嗟無告猶欲堅持冰雪操爆竹聲喧

似故鄉繁華滿目總堪傷起去看天天未曉雞聲一唱殘
年了

齊价人移活以詩投贈次韻答之

性懶恒耽逸身閒若避紛當關學望氣載酒欲論文佳翰
誠臻聖新詩更執羣枝棲欣不遠時莫挹高雲

見博者

好將孤注作機關名士清談未是閒驛騎但能傳捷報出
遊何必不東山

自疑

我自知人人未知為人謀得已偏疑拈詩且脫寒酸氣作
夢偏多欣喜時卧學袁安恐鐵死乞回伍員甄欲投誰可

麟聲應年來少一味虛脾祇自欺

戲題

十五年來一故吾衰顏無奈白髭鬚只應遍處題詩句莫
問量江事有無

庭中白菊新開

新粧入夜洗胭脂移向燈前賞一卮不覺更深花共醉影
隨斜月舞遲遲

野鶴

獨得孤鶩趣難違天性真優游俯仰適愛惜羽毛新高與
烟霞狎廉為鴈鶩噴朝遊蒼海表夜唳驚江濱骨老飛偏
健身閒瘦有神已知矰繳遠幾閱雪霜頰舞月寒流影依

松靜絕塵乘軒爾何事翻欲賤朱輪

夜眠聽雨

遇晴常聽月無月聽偏難海怒聲疑近溪喧勢作寒閒枝
驚鳥宿野渚洽魚歡夢與詩爭局詩成夢亦殘

齊价人旋未及言別茲承東寄欣和

忽帶青雲去惟將逸韻留剗舟知待雪陶徑已辭秋風足
高山水光原燦斗牛瑤華承寄問多病獲新廖

仲春日友人招飲不赴

並無一事慰相知占住桃源亦頗宜詩債屢稽明月夜酒
緣偏悞好花時頻收靜致留春雨忽發新思寄柳村却訝
漁人焉得到遂令雞犬也生疑

郊遊分得青字

和風催我出郊去好鳥還宜載酒聽草色遙聯春樹綠湖
光倒映遠峯青歌喉潤處花初落詩韻拈來醉欲醒逸興
強尋豁目處頽然獨立望滄溟

菊受風殘又復無雨潤纍纍發花雖不足觀亦可聊
慰我也

天風吹不盡憔悴復舒英似有催詩意還多望酒情會當
枯亦發是乃困而亨愛惜饒真賞休將境遇評

重九日登嘯卧亭

重陽節至客心悲託興登臨酒一危健挽石梁看沒羽醉
摩字影讀殘碑當年運數終窮九北載憂危共此時爲開

生涯在何處黃花知以晚為期

看菊

我昨咏句須相將造芳圃南種悉珍奇日所未經覩何須
問主人攜樽直入廡主人笑出迎看花有儔伍因之同歡
酌脫畧如太古爾我與菊花亦竟忘賓主即此稱快哉主
人有餘賈相結再來期與酣慎莫拒乘此花正開聊以慰
辛苦詰朝勅庖人折柬招眾父我亦與其中晨興便接武
入門聞清香舉目愛花嫵登筵飲醇醪飽德銘肺腑為樂
欣正長引商復刻羽陽春天氣佳月麗清虛府秉燭繼夜
遊分吟索韻譜才推河間雄箋飛白雪舞諸公八十高自
足當繡虎我乃欲效顰如弄翰門斧瞻言棲依處何其金

門塢

城以南亦
有金門塢

傲骨我終持不與時仰俯朗吟乞食詩

無以濟終宴飲酒不能多所畏罰童殺當此知已開強為
盡維醺主人酬勸頻先醒嫌小戶月色滿花枝時將過夜
午運甕有後人為能繼乃祖柴桑獨酌後猶戀晉亡士迄
今景高蹈五字懶規擬維菊與忘言分分自傾吐序晚值
風霜勁節孰予侮藉非高士流濫賞奚足取共識此中意
斯會同友輔

盧司馬惠朱薯賦謝

隔城遙望處秋水正依依煮石烟猶冷乘桴人未歸調饑
思飽德同餓喜分薇舊德縈懷抱昔為我于茲更不違
謝王愧兩司馬見贈

甘載仰鴻名南來幸識荆志機同海客尊義締寒盟霜雨
時需切東山望不輕流離誰似我周急藉先生

癸卯端午

年年此日有新詩總屬傷心鬪旅時却恨餓來還不死欲
添長命縷何爲

海天多雨濕端陽閉戶淅然一枕涼不是好高偏絕俗并
州今日作商量

笑予何事日栖遲不讀離騷便賦詩幾度爭節欲問酒蒲
香隔院竟招誰

感懷七首

未伸靖節志居此積憂悵退避依麤侶流離傍屠官身

因性懶我拙任人工鳥上風威厲衾寒夢未終

採薇思往事千古仰高蹤放棄成吾逸逢迎自昔慵花枯

遶雨潤山險倩雲封卽此烟霞外心清聽晚鐘

不改棲遲趣偏因詩酒降晨風搖遠樹夜月照寒缸地靜

長留古心幽豈逐龍興來懷友處結韻老梅椿

蓬蒿老仲蔚卜亦賣成都獨釣詩千尺分耕雲半區樂饑

水有泌行乞市非吳但是棲依者相將莫問途

朋來閒話舊感歎到斜曛聯袂招新月分途送暮雲梅寒

搖夢影筆凍冷花紋興倦登樓矣依劉今未聞

南來積歲月又看荔將花志欲希前輩時方重北衙隱心

隨倦羽寒夢遶歸槎忽竟疑仙去新嘗蒙頂茶

忽爾東將半居諸不肯停新詩紫雪夢愁思入寒局同調
予聲氣時賢重典型敝廬依大武遙接數峯青

思歸五首

歲歲思歸思不窮泣岐無路更誰同蟬鳴吸露高難飽鶴
去凌霄路自空青海濤奔花浪雪商飈夜動葉梢風待看
塞鴈南飛至問訊還應過越東

颯颯風聲到竹窓客途秋思更難降霜飛北岸天分界月
照家園晚渡江荒島無薇增餓色閒庭有菊映新缸夜深
尋友沿溪去怕叩柴門驚吠龍

潮水如從天外來澄光一片隱樓臺東山與懶藏遊屐粟
里花^錦覆酒杯熟慣窮愁詩債逼久安寂寞道心開洗心

欲挽河猶遠利涉當前藉大才

不飛霜色到疎林蘆雪楓丹秋已深民習耕漁因土跡天
留風月絕塵侵山容漸老添詩料海氣凝寒動客心絺綌
自看還敝甚無衣空搗月明砧

山空客睡欲厭厭可奈愁思夢裡添竹和風聲幽曼籟桐
篩月影靜穿簾暫言放浪樵漁共久作栖遲貧病兼故國
霜華渾不見海秋已過十年淹

山間五首

戰攻人世界隱我入山間且作耽詩癖誰云運甓閒松杉
生遠影風雨隔前灣天路遙看近歸雲共鶴還

已當天末處地亦近南交欲雨虛帷潤無家壯志拋桐看

幾落葉燕記屢營巢正作還鄉夢虛窓竹亂敲

只說暫來耳淹留可奈何驅羊勞化石返舍擬揮戈我恥周旋倦人言厭惡多旅途宜自惜慨以當長歌

餓已千秋久人堪飯首陽苦憂徒反側無事笑徜徉慨想風雲合迴思雨露長只今空寂寞能不戀滄浪

長松不可俯遠視立亭亭月色來窻曙山光到海青荒村餘古意老鶴愛脩翎正發臨池興憂來筆又停

州守新構僧舍于南溪人多往遊余未及也

沿溪傍水便開山我亦聞之擬往還一日無僧渾不可十年作客幾能閒書成短偈堪留寺說到真虛欲點禪正有許多爲政處僅將心思付禪關

蛙聲 有引

寓居窄逼庭草不生時值秋霖雲深日暝入夜至

更餘雨聲暫歇殘雲宿于天際微月出于東方忽

有蛙聲出自庭側僅僅孤鳴或斷或續豈呼類而

寡朋抑離羣而自咏欹枕聽之似爲有致不若池

塘亂鳴徒聒噪人不成夢也披衣而起挑燈咏之

時當默處懶爭鳴夜向空庭獨發聲低逐蛩號音不亂高

隨蚓曲氣還清官私却混今誰問鼓吹難齊部未成雨後

竹中空自怨並無飛羽宿啼更

咏籬竹

分植根株便發枝炎風空作雪霜思看他儘有參天勢口

爲孤貞尚寄籬

海中島

左都史勞之辨浙江御史

海中島各一方古若茲况漢唐勝國末鄭寇強踞其壤恣

跳梁潮汐駕帆檣肆擾掠毒閩疆

皇赫怒整斧斯命樓船下扶桑寇日蹙乃求降陬兼濞梯

且航置郡縣破天荒貢皮幣賦蔗糖銷兵氣日月光

竹溪寺

楚宮偏得占名山帆作蠻州第一觀瀾引遠泉穿竹響鶴

朝朝磬候僧餐夜深佛火搖鮫室雨裡檳榔綴法壇不是

許珣多愛寺須知司馬是閒官

赤嵌城

特立巍巍控太清烟霞都自脚根生羞為白髮蠻官長親

上紅毛赤嵌城日月過天疑見礙魚龍駭影盡潛驚何堪

望斷他鄉日滄海茫茫故國情

臺灣雜咏

春盤綠玉薦西瓜未臘先看柳長芽地盡日南天氣早梅

花纔放見荷花

釀蜜波羅摘露香傾來椰酒白於漿相逢岐路無他贈手

捧檳榔勸客嘗

東寧雜咏六首

高拱乾

春臺廣廈銜虛署校藝監軍職濫分無力椎牛頻饗土有

時倒屣細論文平生拙處勤難補異域愁來酒易醺筋力

未哀官味淡函關西隔萬里雲

有懷須學蘭相如每遇廉頗獨讓車晚圃晴霞秋習射半

牕苦竹午臨書羣公望隔三山杏 聖主明周萬里餘素

志漫言伸未得忘機直欲混樵漁

尺檄如傳空谷聲重洋間隔文阻風經月少人行關山已

歷三千里檣櫓猶遲十一更廈門至臺郡水洋十一更地煖臘殘無雪

到憂深髻裏任霜橫眼穿何處天邊鴈京雒難忘故舊情

竹弧射鹿萬岡巔零網張魚百丈淵幅布無裙供社餉隻

雞讓食抵商錢文身纔起瘡瘼色赤手誰將垢做前為語

縮符銜命吏遠人新附倍堪憐

索居寂寂近瓜期報道清班擬暫移近開邸抄開列司道補京卿者十人余忝

名高高適豈堪常侍後班超惟有玉關思封侯夫婿何須

其中悔學步兒曹人更蕊自笑浮名終日累海濱漫守使君碑

誰言習俗亂絲同攬轡澄清乏寸功拊輯尚慙屏翰寄吏

番何日成樓空擬提片石安歸棹聊訂新編當採風臺郡無志

余甫編輯此去中原詢異事仙桃長對佛桑紅

安平晚渡

日脚紅彝盡烟中喚渡聲一鈎新月淺幾幅淡帆輕岸濶

天遲曠風微浪不生漁樵爭去路總是畫圖情

沙鯤漁火

海岸沙如雪漁燈夜若星依稀明月浦隱躍白沙汀鮫室

寒猶織龍宮照欲醒烹魚沈醉後何處曉峯青

鹿耳春潮

海門雄鹿耳春色共潮來二月青郊外千盤白雪堆線看沙欲斷射擬弩齊開獨喜西歸舶爭隨落處回

雞籠積雪

北去二千里寒峯天外橫長年紺雪在半夜碧雞鳴翠共猗嶺積炎消瘴海清丹爐和石煉漫擬玉梯行

東溟曉日

海上看朝日山間聽曉鐘天開無際色人在最高峯紫閣催粧鏡咸池駭浴龍風流靈運句灼灼照芙蓉

西嶼落霞

西嶼澎湖近晴霞返照時秋高移絳樹海晏捲朱旗孫楚

城頭賦劉郎江上詩淋漓五彩筆直欲補天虧

澄臺觀海

有懷同海澗無事得臺高瓜憶安期棗山驅太白黿鴻濠歸紫貝腥穢滌紅毛濟涉平生意何辭舟楫勞

斐亭聽濤

島居多異賴大半是濤鳴試向竹亭聽全非松閣聲人傳滄海嘯客訝不周傾消夏清談倦如驅百萬兵

郊行卽事

臺灣人王兆陞

寄身重海外默坐計生平幸隸芙蓉署欣遊細柳營深村無犬警遠渚有蛙貞夜雨長方歇驅車再問程

續脩臺灣府志卷二十三終

續脩臺灣府志卷二十四

欽命巡視臺灣朝議大夫戶科給事中紀錄三次六十七

同脩

欽命巡視臺灣朝議大夫雲南道監察御史加一級紀錄三次范 咸

分巡臺灣道兼提督學政覺羅四明

臺 灣 府 知 府 余文儀 續脩

藝文五

詩二

乙酉三月十七夜渡海遇颶天曉竟澎湖不得回西

北帆屢瀕于危作歌以紀其事 孫元衡

義和鞭日日已西金門理檝烏鵲棲滿張雲帆夜濟海天
吳鎮靜無纖翳東方蟾蜍照顏色高低萬頃黃琉璃飛廉

倏來海若怒殞颺鼓銳喧鯨鯢南箕簸揚北斗亂馬銜罔
象隨蛟犀暴駭鏗訇兩耳裂金甲格鬪交鼓鞏倒懸不解
雲動席宛有異物來訶詆伏鯢僮僕嘔欲死膽汁瀝盡攣
腰臍長夜漫漫半人鬼舵樓一唱疑天雞阿班眩睫瘵筋
力出海环玳頻難稽不見澎湖見飛鳥鳥飛已沒山轉迷
旁羅子午晷度錯陷身異域同酸嘶况聞北礁沙似鐵誤
爾觸之爲粉齏澎湖山南有北礁下爲鐵板沙回帆北向豈得已失所猶
作中原沉浪鋒春漢鷁首立下漩渦白高桅低怒濤內濺
頂踵濕悔不脫殼爲鳧鷖此事但蒙神鬼力官然大地真
浮穉翠華南幸公卿集從臣舊識咸金闥挂冠神武蹤已
邁願乞骸骨還山谿讀書有兒織有妻春深烟雨把鋤犁

危舟得泊晚飯書懷

大海狂瀾驚轉舵金山到似解重圍此生不道有來日欲
往何如成獨歸麤糲儒餐初定痛蕭疎旅鬢忽知非百年
好是雙行脚夢繞湖山舊翠微

海波夜動燄如流火天黑彌漫亦奇觀也

亂若春燈遠度螢坐看光怪滿滄溟天風吹却半邊月波
水杳然無數星是色是空迷住著非仙非鬼照青瑩夜珠
千斛誰拋得欲掬微聞龍氣腥

抵澎湖澳

孤鳥如穉一葦航情懷跋扈與相羊身隨雲鳥投清塹洋
淺曰清水塹○夜鼓天風過黑洋鱗鱗魚堪入饌海鱗翠色

竹灣花嶼俱澎湖山名有飛鷗此間未是埋憂地貫月浮槎正渺茫

抵臺灣

八幅征帆落遠空蒼龍銜燭晚波紅洲前竹樹疑歸後天外雲山似夢中鹿耳盪纓分左路鯤身沙線利南風身尾有沙線南風可泊書名紙尾知無補著得詩筒與釣筒

浪言矢志在澄清博得天涯汗漫行山勢北盤烏鬼渡潮聲南吼赤嵌城眼明象外三千界腸斷人間十二更自厦至臺計上更我與蘇學同不恨羣游奇絕冠平生

曉起漫成

百瓮餘葢祿料貧閒階散步不沾塵如哀如訴車音遠相喚相呼角語頻車輪聲薄其音甚楚市賣吹角若相和然舞影日翻沙燕乳細香風嫋樹蘭春年來絕塞烽烟慣博得滄洲耳目新

晚眺

他鄉莫望遠獨立况黃昏落日錄大海歸舟刺葛巒鷓鴣無緩翦魚虎不空翻此際忘機者心情孰與論

病後書懷寄孫嗣

病餘秋氣總陰森一卷莊騷苦竹林海日斜時潮水澗山風起處瘴雲深偶從甘蔗逢佳境忽見芭蕉賦卷心消受

短檠人靜後守官軋軋草蟲吟

中秋夜對月

海濶偏宜月天南不覺秋自饒家尚在甘與夢月送香車

活浮桂

桂樹滿山人齋香則病亦瘳也

狂潮欲上樓一杯鄉國酒

沽酒不可飲海船多載惠泉

休為看花留

諸羅縣卽事

龜佛山前八掌

巖名舒離題絕國展

皇輿木城新建煩酋長官屏粗管似客居北向羹巢環漳

海西偏估船就牛車嗟余慣卻殊方俗鉛葉隨身可自如

三林海上海上卽事

天外何爭半日舟暫將艇室作郵亭霧沈秋嶂曉風毒雨

過海濼雲氣腥萬里浪邊來視事一條沙外去揚舠

此地鐵沙

一線舟觸之立敗

重陽節近休回首那得登臺醉不醒

返署

十日山中詠採薇萬山回首尚依稀滿城鳥語秋多暖小

院蘭香人獨歸生硬吏胥鋪印席疎慵僮僕啟書帷開樽

不道登臨事唱出新詩興欲飛

感物候

客久澹無欲無鵲非所望斷我近音信無雁成兩傷燕鷲

不肯蟄仲冬來草堂菊以玉為菜樹如琴有房傍雌鳴鳴

蝶依戶守蛛蟄宵深一葉墮十月天微涼寄言閨中子毋
念我衣裳

春興三首

北闕南鄉思不禁拋將身事任浮沉宦情老隔鷓鴣路歸
夢遙逢曉曉音檻外花光紅露滿門前春氣碧雲深忘機
習靜饒生意葉葉甘蕉展故林

門有烟波屋有林筍無華袞橐無金芳春逸興花同發永
夜遙情月共沈鷓鴣螺前開笑口靈魚編裏問初心散人
乞得閒官職天外應須著冷吟

宜雨宜晴三月間朝登高嶼暮沙灣
曉雲晚日千金樓度海邊天兩碧環林下學占爭喚鳥前人問鳥語而知吉區

最深山

臺山無正名

一生心折陶元亮止酒篇從此際

刪

海外驚霜叱雪無復寒林可觀秋日行經木岡山下
白茅作花宛如朔雪晨霜足補山川所不逮率簡

澄菴宋明府

茫茫宿莽本荒塗行到瀛南勝畫圖夾路霜華隨野濶到
山雪色共雲鋪風微灑听飄楊柳月淡江天冷荻蘆黃嶺
一聲三櫓酒海邦秋興未全無

遣興

齒頰添香生酒暈檳榔古賁佐扶留青青盛向金樽小拾
翠佳人減却愁

玻璃濃露豔幽光鄭宅春芽園粉槍白嫩蟻房調最滑綠
肥龍虱細生香

贈海客

頭白不須憐安居已是仙開門遲過鳥孤嶼得遙天潮視
盈虧月湖之大風隨順逆船海風不分南北此中堪玩世
知有太平年

聽海客言寄嘲北莊友人

道是求仙歷險艱半思利涉半躊躇千條岐路迷銀嶺一
片晴雲想玉山貪挹龍涎乘蟒葛競聖墨豹逐蜂蠻以腰
非關海客談言妄縱到瀛洲未肯開

秋日雜詩十二首

八月渾如夏冰紋枕簟斜渴虹淹滄溟有毒霧莽風沙破憂
無名鳥傷心未見花自憐情漫浪更擬著浮槎

西偏惟落日東向一烟縹不爽鉞盤路無形鐵板關渡海
南為信曰鉞路又臺郡無形魚翅紛似葉戰舸靜如山深
穩成安宅毋憂海國頑

亦有奇情在都疑夢裏逢潮生驚戰鼓日盡駭邊烽臺郡
皆山不見初日類陽如烽挾火麒麟海風有名麒麟暴
隱出夜深方隱奇觀也摧雲傀儡鋒傀儡山時有雲氣其秋容何處好千
里木芙蓉

諸峯多窟宅深就瘴雲安竹塢疑熊館茅居結馬鞍山荒
朝獵豹田熟夜防獲此是義皇上文身似羽翰

信此飄零眼浮觀別異同四時無正候百物有奇功版籍

翻稽婦新集之民遷徙不常有婦者為定戶蠻村渾賤翁番人貴力食老則安坐待哺然

每遭凌賤糟醞聊可啜應笑學鄣筒省酒制大竹釀之味實不佳

海國多新意生涯自不貧清流環麓戶白水散零人海白則淺

可漁納零露龍嘘熱油雲層積鱗海外露濃如所嗟鉛葉

客風俗未相親

殊方今樂國襁負自成隣傷醲酬田祖蠻語賽水神蘋苗

田鹿喜蕉葉野牛馴山有野牛網而經術能師古幽風屬

此人

秋雨滋篔簹淒風養秀萼醒醐閒伴少椰榔野情遙敲擊

煎餠竈橋維煨蠟窠喧罵那可息猿鶴漫相招

物猶殊燮爛問俗竟何如樂事喧喧豈敢哀音情憤申蒼荒

逐火鹿畜精鹿為精鹿火海熟上潮魚歲有魚逆潮而生

理渾難計安恬可瑟居

欲補蟲魚註徒多玩物情文禽懸羽息俗名飼沙嶼寄螺

生螺生螺殼中守拙蠅蛸隱螺不爭雄蛸鳴大都觀變

化蠢蠢只空名

秋宵常獨坐宜楸漫相招善積水光搖動連民氣鬱陶

蝠飛迎月露雞唱逐風潮潮上舞引領還空舍余生本寂

寥

回首平生事心將跡並奇溯江會學顧杜詩顧心似江水

憶之入海為求詩又札句詩盡人問雲水交相適魚龍雨

不疑還舟無處覓大火又西馳

海市清言

白沙洲軟長葦苔蓋屋青林不用栽兩乳燕長夢星宿
一歲再乳四時花共一瓶開巧人西域管工到名題東吳載酒
來解語鸚哥成五色更無鳥譯費疑猜

暮春郊行李爾有作

三春萬事都如夢今日行春客思緒好雨何處綠病骨涼
風似解逐輕車山中漸長魚背木溪上新開龍爪花掃地
榕鬚遮戶竹黃鸝應戀野人家

留滯海外修路三載追維所歷不無慨焉

海東郡邑祇相安鼎歷三區一島盤蠻嶂高低雲亦險
潮咫尺路方難流光淡宕同殿室氣味酸寒似橋官禦暴
應難憑隻手戈船鐵騎盡桓桓

推擠不去已三年東坡句千首詩拋海一邊初到似逋還似

謫卽今疑幻却疑仙後車何處無前轍大國由來是小鮮
疎懶不愁魚鳥笑刺桐城裏得安眠

學得散人工散法簿書拋却野情多不經意得花前句微
有情調醉後歌觀水蟲魚增注腳誌山鳥獸費遮羅叢議
就俚辭雕飾未似張憲說泛河

病中二首

物態浮觀物理沉瘴山淺歷瘴雲深四時氣有三時夏一
日風生半日陰俗語九海外自知堅道念病餘不覺長

心大通中散無由覓九籥應難鍊紫金

幾日淹留似醉鄉今來小愈坐胡牀羹調玉糝梳椰軟茶
者籠團橄欖香糕字其放教女婢紙寫畫就走兒郎時值重九
此翁得喪無何有炙背扶人傍短牀

冬日草堂漫興

杯泛寒姿菊有英燕飛蝶舞似春城山椒子結金鈴小調
出香螺軟玉羹

烹茶方法教兒僮蠅眼清聽火候工汲取竹林僧舍水雨
芽來自大王峰

望洋

望望殘春生事微金門廈門多夕暉亂山斷處天應盡
髮窮時鳥不飛潮汐東西遊子路礁沙開闔水軍威奚囊
萬里復何有未典來年兩賜衣

黑水溝

氣勢不容陳茂罵犇騰難著謝安吟十洲徧歷橫洋險百
谷同歸弱水沈黔浪隱檣天在日神光湧權日當心方知
渾沌無終極不省人間變古今

大武郡登高

過海重行五百里到山更上一層臺地留歸路還非客秋
在中原不用哀霜葉似花何處有瘴雲潑墨幾時開固應
未落詩人手判却鴻荒待後來

鐵線橋村市

聚落魚鹽市通衢負販居潮頭低窄港橋背受輕車伐蔗
飯牛足誅茅煨蠟餘青橙與霜橘治苦代新蔬

颶風歌

九瀛怪事生微茫瘴母含胎颶母長虹蓬出水勢傾墮
飲水稱爲雲車翼日爭廻翔 須彌山下風輪張
悍燦怒天爲盲塌然于扶桑之木末吞吐夫天池之巨洋
訶哮簸蕩鼓神力不崇朝而周廻于裸人之絕國黑齒之
窮鄉颶颶颶無不有一一堞堞塵飛揚突如神兵交萬
馬崩若秦家天地瓦颶颶起中央沙礫盡飄灑鼉身最厲
挂坤軸義轂軒軒欲回輶怒鯨張齒鵬奮飛涸鱗陸死鹽
田肥嗟哉元龜入殼避武威伏蟲盡蹂躪植物將誰依

門大鳥何時歸我聞山頭磐石墜海水藪或轟騰五百里
戰軻連橋吹上山乖龍罔象迫遷徙萬人牽之返於止
嗚呼海田幻化良如此又有麒麟之颶水爲妖颶颶燼燼如
焚燒黃髮遺民一再見闔門堅壁迷蒸燻青青者黃黃者
黑死海破塊山枯焦飛廉狂癡肆其虐祝融表裏夫誰要
帝天不下聽仰首空雲霄舉筆用紀其事爲長誼昨者估
客歸爲言落際事入溜爲落際 遭此四面風溟滂無由避連山
波合遠埋空湧嶂劃開驚裂地木龍冥鬱叫幽泉海船下用並木
稱爲木龍神實棲之忽有 桅不勝帆枕出位閃閃異物來
異聲則云木龍叫主凶 告凶鬼蝶千羣下窺伺赤蛇逆浪掉兩頭白鳥掠人鼓雙
翅天妃神杖椎老蛟攘臂登檣叱魔祟各駕祖棍事急矣可驅水怪

划水求仙披髮執箸虛搖船牛馬其身蹄其手口銜珠勒
加鞍韉雷霆一震黃麻宜金雞放赦天所憐扶歆盡仗六
丁力中原一髮投蒼烟芒刺在背鉗在口自量歸渡霜盈
顛爲舉一杯醉南斗胡爲乎職司喉舌而箕張其口
聖人御極不鳴條噫此厲氣焉能久雄分離分理則均強
爲區別楚人狙花信何妨甘有四失不萬盈九勳物
神功齊雨暘南風薰兮愠何有願箕察所好剛柔用其中
城威自艾安爾宮三年不波萬國來同吾將查乘貫戶歷
四荒八極徜徉而東

朔四日泛海赴安平鎮

海國春回問鹿甕風微浪靜受朝墩雲屏列翠飛孤風成

鳳烟鏡浮花漾七鯤古墩初依新樹色靈槎遠赴碧天痕
木知鐵騎戈船在落落眾寮水面村俗稱漁家
爲眾寮

裸人叢笑篇

聖威懾海若崩角革頑凶昔從倭鬼役今爲

王者農酋長加以冠族類裸其躬震驚鞭撻威嬉戲刀劍
鋒臺郎出守羅星宿云是大唐王與公五十二區山百重
南極喚蜺北雞籠混沌不鑿天年終

短布無長縫尚元戒施編桶褻本陋制不異蠻犵狁蠻
鑿齒喪其親爾蠻鑿齒媾其姻雜俗殊風仁不仁

管承鼻息颺簫音筠亞齒隙調琴心女兒別居椰子林雄
鳴雌和終凡禽不顧耶娘回面哭生男贅婦老而獨但知

生女為門楣高者為山下者谷猶女感新相鬪妍醉歌跳
舞驚鴻翩首長朝來易版籍東家麻達西家仙

麻達既婚名仙

接飛軼走縱行橫施繡肌雕腋勇者是儀龜文蟬翼蒙表
貫肢背展鵬鷲胸獐豹螭跳脫臂釵瓔珞項披蠢然身首
犁魏尸

海山宜鹿依於樸檉麋麋呦呦羣行野伏諸番即之長鉞
勁箠毒罨橫噬倍於殺戮憑藉商手賦公局獲車既傾察
有慾播犇狃食何苦辛直朶頤於別蹄而剖腹

爾之生也懸刀伐弧爾之壯也畜犬為徒柔荃以卧肉以
鋪縱橫猛氣凌殷虞奮标狀初不可呼爭先奚翅當百犬
功多齒鈍棄匪辜口暮壘壘嗥路隅

虎山可深入愧編難暫逢不競人肉競人首殲首委肉於
肥縱驚禽飛駭獸走腰下血糝糊諸番起相壽

崩泉下澗三尺波女兒投水如羣鵝中官投藥山之阿至
今仙氣留雲窩生男洗滌意非宅無孿無靡無沉疴他日
縱浪有勲業為鯨為鯉為蛟鼉

鼉鼓轟林人野哭舉屍燉炙睇以燠蠅蚋不敢侵螻蟻漫
相逐埋骨無期兩頰屋安置鬼牛與鬼鹿鬼殘日夜傷幽
獨番死鳴鼓而哭火炙令乾露蓋屋中屋傾而後掩所遺皆稱鬼物無敢取者號其婦為鬼殘衆共棄之

金人竄伏來海濱五世十世為天民花開省識唐虞春肝
陌雜作如無人披草戴笠錯口含唇道路以目爰契天真
華人侮之默不嗔秣粒如豆箕如薪

羣嚼玉英粲醅醪為氤氳屏五齊三事而秋康不聞準身
準口量餘粟一榼一瓢萬事足蚩蚩者無懷古民白刃醋
父醒殼鯨番嗜飲通計所食之餘悉以釀酒其釀法則聚男婦嚼米納器為之亦一奇也

買舟

三宿能無戀故桑自來歸鳥厭回翔已亂大井潮頭館干例

大井頭設館稽查商船便買長梢颶尾航乘風尾濤海甚利別友定難逃酒

累治裝偏覺為詩忙竹蕉深處頻回首縹緲浮瓠一草堂
草亭落成時題浮瓠二字于其上跋云五石之瓠為大樽而浮江海善用大也浮之耳于瓠乎何有苟之干無何有之鄉余心與俱也審矣亭成用以顏之

海會寺

雙廣

此地當年擬館娃蜃樓海市霸圖除王孫已去遺芳草宮

院誰來掃落花歌管聲沉聞貝葉舞衫采徹現袈裟我非
竹院空閒過喜見梯航屬一家

手植文公祠梅花

陳瓊

賞偏花叢愛老梅賢祠左右手親栽寫真舊有廣平賦入
妙詩稱和靖才風送清香迷瀚海月移孤影出澄臺應知
雨露深無限獨步初春傲雪開

文昌閣落成

雕甍畫棟鳳鸞騰遙盼神霄最上層台斗經天由北轉彩
雲捧日自東升參差烟戶排青闥繡錯河山引玉繩今夕
奎光何四映海陬文運卜方興

臺灣雜詠

陳兆蕃 晉江人

茅簷竹壁半耕農，士女于今罷斥烽。
山色千年森虎豹，潮聲萬里撼蛟龍。
朝裘午葛邊嵐異，擗鼓催航野渡衝。
自是天開南極處，向來裸髮也雍容。

赤嵌城觀海

陳聖彪 侯官人

孤城獨上俯瀛洲，極目蒼茫一望收。
落日半痕天共白，晚潮千頃月同流。
滄溟隱入蛟龍窟，島嶼寒生海市樓。
波浪不揚征戰息，舳艫閒作釣魚舟。

岡山

車行十里見岡山，山接雲連萬仞閒。
高阜野花紅灼灼，平疇春水綠閒閒。
雄分壁壘龜蛇合，勢莫波濤竹木環。
聲教漸隨新位置，一犁春雨潤沙灣。

上淡水社

鳳山令 宋永清 萊陽人

遙遙上淡水，艸色萑淒迷。
魍魅依山嘯，鷓鴣當路啼。
茅簷落日早，竹徑壓風低。
歲暮猶春意，花香趁馬蹄。

九日羅山遇雨

蕭蕭風雨度重陽，匹馬羅山舊戰場。
白髮漸隨秋色老，黃花空憶故園香。
雲迷古樹千峰遠，霧鎖清溪一水長。
莫酒年年常醉客，爭雄壁壘幾滄桑。

登八里全山遠眺

諸羅令 周鍾瑄

寒裳直踞千峰上，萬里蒼茫一色同。
遠目但餘天貼水，近聞惟覺浪號風。
巨鯨有首低擎地，瘴雨無根直幔空。
寂寞斗牛誰再犯，好將消息問嚴公。

番戲五首

蠻姬兩兩鬪新粧，蹀躞花陰學舞娘。
珍重一天明月夜，春來底事為人忙。

不掄檀板不吹笙，一點鉦聲一隊行。
氣味何如初中酒，山花翠羽鬢邊橫。

聯翩把袖自歌呼，別樣風流絕世無。
番調可知輪白雪，也應不似潑寒胡。

野氣森森欲曠天，維摩新病未成眠。
空餘無限羅伽女，亂把天花散舞筵。

一曲蠻歌酒一卮，使君那惜醉淋漓。
但令風物關王會，我欲從今學畫師。

吞霄觀海

浩渺無因遡去程，仙槎客泛正須評。
輕浮一粒須彌小，包括恒河色界清。
世外形骸杯可渡，空中樓閣氣嘘成。
情知觀海難爲水，更有紅輪向北生。

關渡門苦雨二首

無賴陰雲拂地垂，客愁如緒一絲絲。
那堪更向秋風裏，卧聽黃梅細雨時。

臺海府志 卷三十四
蠻烟如霧復如雲縷縷連江幃夕曛猶喜長風能破浪干
山猿嘯雨中聞

望玉山

浮嵐高捲日初生一片晴光照眼明積雪不消三伏後層
冰常訝四時成疑他匹練非吳市遮莫胥濤向越城大璞
已教天地鑿山靈穩卧不須驚

糕圃

陳夢林

小圃茅齋曲徑通參天老樹鬱青葱地高不怕秋來雨暑
極偏饒午後風海外雲山新畫卷窓間花草舊詩筒莫愁
紙盡無揮灑纔種芭蕉綠滿叢

丁酉正月初五夜羅山署中大風次早風歇飲酒紀

之以詩

海西蟄起蛟龍怒昨夜海吼風不住風聲入耳駭人聞風
勢如癡復如颯客子殘燈半滅明閉門欹枕空百慮山房
四柱柱影搖有時風欲挾之去萬馬蹄奔劍戟鳴虎豹搏
噬急如注往來嘈雜不成眠一夜夢魂無宿處平明起視
浮雲決風力漸微聲漸歇呼僮煖酒賞春朝似怯寒吹簾
幔徹因憶去年臘月初番子渡頭朔風烈番社紛紛亂捲
茅竹樹倒披梢半折耳鼻填沙眼怕開行人却走馬蹙躡
山溪狂似海波潮溪水冷于軸頭鐵雙犢亂流車苦遲番
兒強輓膚破裂下馬停車暫息肩店舍無烟酒不熱番兒
力盡凍且僵呼起聊爲哺與啜可憐幅布半圍身青錢那

惜恣饕餮此時如我敢言寒猶有傲裘重補綴况復今朝
風已春曉明几淨椒盤新水仙香發綠尊滿春冷無眠奚
足囂風波自古仗忠信念爾孤蓬海上人

題臺灣周明府鍾瑄小照即以贈行 蔡世遠

勃青漲瀚巨流滄掀揭海飛盡海立丈夫磅礴撐林森二
巫兩習徒濡濕周君賦賦貴州人鑿離堆圖南直奮北漠才
昔宰諸羅今復至橫海初回橫海來昨自監州晉郎署姓
名赫赫官庭著因軫澤鴻奠瀛島制府入陳煩借箸狗山
蚊港湧歡聲猴悶瑯嶠延首迎仁風再拂繞沙嶼花柳鳧
雛異樣清地蛇原蟹兩穎禾鼓宮蜃戶舒陽和停澄若水
為甘露立池鱗海無鯨波我昔慕君未君識君整鬣宮事

丹刻屬我為文文未工蠅聲蚓竅徒偈仄遲君此日到三
山快盼高論豁塵顏胸濤巖電炯相對粒粒聚米陳臺灣
渴來示我丹青圖吟風弄月淡清娛三鬣五鬣蒼髯叟六
椀七椀紫琳腴匣琴不彈有微意謂言遞鍾非輕試角民
徵事在其中要在揮絃施撫字君今一鼓排 九閩再鼓
奏明光坐使旁春咳首掃欃槍穿胸儋耳盡來
王豈徒七鯤之澤北線之波靜不揚

臺海竹枝詞八首

諸生 郁永河仁和人

鐵板沙連到七鯤七鯤身皆沙岡也鐵板沙性重得水則
堅如石舟泊沙上風浪掀擲舟底立碎
矣牛車千百日行水中
皆無軌跡其堅可知
鯤身激浪海天昏任教巨艚難
犯天險生成鹿耳門

雪浪排空小艇橫渡船皆小艇也紅毛城勢獨崢嶸渡頭更上牛

車坐沙堅水淺雖小艇不能達所必藉牛車挽之日暮還過亦嶺城

編竹為垣取次增官署插竹為籬比歲增易衙齋清暇冷如水風聲撼

醒三更夢帳底斜穿遠浦燈無塔垣為遠浦燈光直入寢室

耳時聞軋軋聲牛車乘月夜中行牛車挽運百物月夜車聲不絕夢回

幾度疑吹角更有牀頭蠅蝶鳴

蔗田萬頃碧萋萋一望龍葱路欲迷網載都來糖部裏只

留蔗葉餉羣犀蔗梢餉牛

青葱大葉似枇杷臃腫枝頭著白花番花開五瓣白色看到花心

黃欲滴家家一樹倚籬笆花心漸作深黃色振折累三日不殘香如梔子病其過烈風度

花香頗覺濃郁

肩披鬘髮耳垂璫粉花朱唇似女郎梨園子弟垂鬘穴耳傳粉施朱儼然女子

媽祖宮前鑼鼓鬧味嚶唱出下南腔以漳泉二郡為下南腔亦閩中聲

律之一種也

臺灣西向俯汪洋東望層巒千里長一片平沙皆沃土誰

為長慮教耕桑

土番竹枝詞十首

生來曾不識衣衫裸體年年耐歲寒嶺鼻也知難免俗烏

青三尺是圍圍

文身舊俗是雕青背上盤蒼鳥其形一變又為文豹藉蛇

神牛鬼共猙獰

胸背爛斑直到屢爭誇錯錦勝鮫綃冰肌玉腕都文遍只

有雙蛾不解描

了髻三叉似幼童髮根偏愛繫紅絨出門又插文禽尾

上飄颻各鬪風

覆額齊眉繞亂莎不分男女似頭陀晚來女伴臨溪浴一

隊鷓鴣漾綠波

耕田鑿井自艱辛緩急何曾比叩隣構屋斲輪還結網百

工俱備一人身

夫攜弓矢婦鋤耨無褐無衣不解愁畚畚一圍聊蔽體雨

來還有鹿皮兜

芥葛元來是小躬剝將獨木似浮瓜月明海濼歌如沸知

是畚兒夜弄潮

梨園傲服盡蒙茸男女無分只尚紅或曳朱襦或半臂上

官氣象已從容

土番舌上掉都盧對酒歡呼打喇酥聞說金亡避元難覓

風吹到始謀居

泛海

浩蕩孤帆入杳冥碧空無際漾萍風翻海浪千山白水

接連天一綫青回首中原飛野馬揚舲萬里指晨星扶搖

乍徙非難事莫訝莊生語不輕

大甲溪

北路營 阮蔡文 漳浦人

蓬山萬壑爭流滄溪石團團馬蹄繫大者如鼓小如拳溪

面誰填通疎密水浹沙流石動移大石小石盪摩溫海風

橫刮入溪寒故縱溪流作鬱壘水方浚脛已難行水至壘
屢命呼吸夏秋之間勢益狂瀾漫五里無從測往來瀉此
不知誰征魂夜夜溪旁泣山崩巖壑深復深此中定有蛟
龍蟄

番社雜詠二首

巡臺
御史黃叔瓚
大興人

絕島中華古未通生來惟鬪此身雄獨餘一面狺猊外人
鳥樓臺刺自工

剝竹爲椽扇縛筴空擎樑上始編茅落成合社欣栢賀席
地壺漿笑語高

臺灣近詠十首呈巡使黃玉圃先生 藍鼎元

東寧大海荒從古無人至明末羣盜巢鳥糞互竊歸鄭氏

奄而有蔓延爲邊忌我 皇捷伐張天威及虜魅遂使瘴

鴉鄉文物漸昌熾川原靈秀開鬱勃不可閉式廓惟日增

蹙縮非長計時有議棄近山田廬及
禁入番界樵採之說所當順自然疆理以

時議勿因去歲亂畏噎却飯饕

去歲羣醜張揭竿三十萬我旅一東征割戈雲見現七日

復全臺壺簞匝地獻可知 帝德深望雲爭革面餘孽雖

時有死灰謀欲煽旋起卽撲除夫誰與爲叛當茲振道鐸

教化不容緩民心原猶水東西流乍變棄之鋌而走理之

忠以勸

臺俗敝豪奢亂後風猶昨宴會中人產衣裘貴戚愕農樁
士弗勤逐末趨驕惡翳凌多健訟空際見樓閣無賤復無

貴相將事博博所當禁制嚴威信同鋒鏑勿謂我言迂中
心細忖度爲火莫爲水救時之良藥

聞學追魯鄒東寧昧如障當爲延名儒來茲開絳帳俾知
道在邇尊君與親上子孝及父慈友恭更廉讓從茲果力
行誘掖端趨向其次論文章經史爲醞釀古作秦漢前八
家當醢醬制義本儒先理明氣欲王洗伐去皮毛大雅是
宗匠此地文風靡起衰亦所望

臺地一年耕可餘七年食寇亂繼風災民間更蕭索今歲
大有秋倉儲補云五穀貴慮民饑穀賤農亦惻厲禁久不
弛乃利于奸墨徒有暹糴名其實竟何益估客旣空歸囊
足此寥寥何如樽節之一艘一百石窮年移不盡農商

我德幸與諸當途從長一籌畫

纍纍何爲者西來偷渡人銀鐺雜貫索一隊一酸辛嗟汝
爲饑驅謂茲原隰的舟子任無咎拮据買要津寧知是偷
渡登岬禍及身可恨在舟子殛死不足云汝道經鷺島稽
察司馬門司馬有印照一紙爲良民汝愚乃至斯我欲淚
沾巾哀哉此厲禁犯者仍頻頻奸徒畏盤詰持照竟莫嗔
慈法果息奸雖寬亦宜勤如其或未必寧施法外仁

臺邑最褊小徵糧視鳳諸土狹賦獨重民困曷以紓臺灣
田一甲內地十畝餘甲租八九石畝銀一錢輸將銀來比
粟相去竟何如納粟弊多端斗斛交相濫折色比時價加
倍復何居鳳諸雖厚歛什百臺版圖墾多或報少以羨補

不敷臺土瘠無曠衝壓且偏枯安得相均勻丈輕三邑俱
征收同內地含哺樂只且

郡東萬山裏形勝羅漢門其內開平曠可容數十村雄踞
通南北奸宄往來頻近以逋逃藪議棄爲荆秦此地田土
饒山木利斧斤移民遷產宅兵之亦斷斷何如設屯戍守
備爲遊巡左拊岡山背右塞大武營旣清逸賊窟亦靖野
番氛府治得屏障相需若齒唇

諸羅千里縣內地一省同萬山倚天險諸港大海通廣野
渾無際民番各喁喁上呼下卽應往返彌月終不爲分縣
理其患將無窮南劃虎尾溪北踞大雞籠設令居半線更
添遊守戎健卒足一千分汛扼要衝臺北不空虛全郡勢

自雄晏海此上策猶豫誤乃公

臺灣雖絕島半壁爲藩籬沿海六七省口岸密相依臺安
一方樂臺動天下疑未雨不綢繆侮予適噬臍或云海外
地無令人民滋有土此有人氣運不可羈民弱盜將據盜
起番亦悲荷蘭與日本眈眈共朶頤 王者六無外何畏
此繁蚩政教消頗僻千年拱 京師

題黃玉圃巡使臺陽花果園

庶吉士

吳王坦

江南人

爾雅自姬公蒐討窮大塊後有山海經所言同誌怪荒略
何從稽於說亦黃稗乃知天地間賦形各萬派若非域外
遊魚猶等鼉躡巡方繡衣行幾及扶桑界東溟凌滄波驚
濤歷湖溍旣至振紀綱問民軫病瘵聞見往往殊耳目爲

一快其中植物繁羅列登而賣五色爛然陳厥狀難盡話
細文如錦章粗文如方罫枝葉非尋常異味皆可曠召工
寫此圖摹仿在公解碧綠與丹硃肖真事揮灑稱名復辨
種按之恣能解我生里閨間未得廣行邁多識慙古人拘
墟徒自絳晴牕試展看意曠若脫械虛名玷使星願無遠
弗屆

又絕句二首

少許猥牀侍釋迦一家眷屬見曇花遙知使節風清候
得金盞灑異葩

珍果圖來命畫師拈花又寫佛前枝牕明几淨清茶供絕
勝黃金鑄像時

過澎湖嶼

巡臺景考祥
御史人

滬矣澎湖嶼海中天一涯島開環四面民聚約千家風剝
山無樹潮侵石有花捕魚生計足不解植桑麻

巡行詩十二首

巡臺夏之芳
御史高州人

節旄高插引晴嵐人擁花驄攬轡銜拜罷耆童迴道左紛
來朱履又青衫
野田清曉碧天空地指扶桑東復東赤嵌城邊雲散彩拓
開海日一輪紅

負暄童叟愛冬溫紅稻成淮擁華門桐竹週遭雞犬靜教
人歷歷認花村

不須挑逗苦勞心竹片沿絲巧作琴遠韻低微傳齒頰依

稀私語夜來深

杵臼輕敲似遠砧小鬟三五夜深深可憐時辦長炊米雲

磨霜鐘咽竹林

虛灘水落漲沙泥南北中分虎尾溪一帶艸荒村舍少年

來新集有烝黎

諸峰攢集黛螺青玉嶺如銀色獨瑩展拓晴雲千萬里插

天一幅水晶屏

二林迤邐接三林淡水濼洄鹹水深極目滄波浮海市一

拳真欲笑蹄涔

龜蛇對峙鎖孤城形勢空傳統領營不築埤頭築海口為

憐安土重紛更

打鼓山頭石罅開懸崖倒拍海潮迴雷聲鼎沸浮空翠萬

里風檣認影來

仙山縹緲閣斜曛石上棋枰舊印紋沙馬磯頭人罕到爛

柯樵子語烟雲

八社丁徭力漸紓閩中餉稅蚤捐除只今宵晝辛勤處謹護

官家十萬儲

東郊勸農

巡臺 楊二酉 太原 御史

時雨既已足命駕東郊行豈不嗜游覽所重在民生涼影

走虹練深竹鳴催耕秧馬踏畦碧麥浪揚疇平村烟間籬

落耆老歡相迎烽消省煩役賦薄無苛征復此兆有年談

笑嘗君羹殘陽搖柿色雞犬含餘情

四合仙梁郡署四合亭側有老榕一株扶疎繁蔭根出地數尺蟠屈虬直如梁
誰將玉斧斲仙榕露葉雲根影萬重疑是銀橋天上落不
因風雨作神龍

新園道巾

路轉埤頭近平山一線連野橋低澗水深竹暗村烟犬吠
花間逕人鋤屋後田不知身異域疑對武陵仙

阿猴武洛諸社

同俗來番社青葱曲逕長家家茅蓋屋處處竹編牆牽手
鼓笙細嚼花春酒香知能但耕鑿真可擬羲皇

過羅漢門山

羅漢雲中塞天開第一重林幽深踞虎潭靜隱蟠龍馬關
盧間道塘虛竹外烽鳥鳴詩行色同出翠微峰

泊澎湖

巡臺 張 涓 錢 德 人

大隘門外渡橫洋羣山滅影流湯湯天水相交上下碧中
間一葉凌波颺少焉紅濤映霞葩條條黑蛟蟻怒墨陸離
斑駁異彩騰繪畫乾坤須五色針盤遠指天南交蒼茫四
鴨心帽旁直上桅尖索西嶼亞班趨捷如飛葆澎湖環島
三十六歷歷人烟出漁屋未須滄海成桑田結網臨淵食
粗足我來收泊媽宮灣舳舻屹立凝邱山三夜驚濤春客
枕夢魂跌宕雷霆間是時望雨憂如渴極日圓晴斷餘岸
北風可但濟行船喚起癡龍擊旱魃

夏日得雨

輪粟重洋役泛舟濤時方略愧前籌萬家聚島如孤旅三日爲霖解百憂聲震地雷橫出海勢分天漢劍懸流會須斗酒從田父叱犢村中看綠疇

東郊勸農

出郭天四垂墨雲挾狂雨勢如萬鏃飛作氣不待鼓彌望青蔥籠物我同栩栩平疇漾穀粒犁鉤應時舉誰能甘惰農自貽樂歲苦爲語蚩蚩氓海濱履

王土黃髮與垂髫願勿入城府熙恬若樵源往來但漁父三時胼胝煩勤焉豈無所况當膏雨餘暑車滿可許烟林布穀鳴陌上策水牯木家園蕭閑坐覽黃芝侶

勸農次書給諫韻

衝泥輿時 汾城東漠漠吹烟竹樹中一桁遙青山寫影千畦淨綠雨爲功耨鋤父老分醇酒比屋雞豚見古風好待如雲秋稼熟來看高廩再歌豐

澄臺小集次韻

澄臺嘉穢密戎戎醉後憑高四望通島市別開帆影外天根純浸水光中迢遙親舍孤雲擁浩渺予懷碧海同日午南薰方薦爽當風不復辨雌雄

大登門

俗作大
擔非

門經大嶽渡橫洋五色波中漾日光起旋聲高驚曉夢吟魂頓仄寄懸牀宿海船中用懸牀四角懸空
而時以防顛簸俗稱扁牀

望向

浩瀚乾坤不見山水晶圓城寬仄環憑誰探取蒲花噴棹
末飛騰兩亞班

鹿耳門

鐵板交橫鹿耳排路穿沙線幾斜迴浪花堆裏雙樓在更
遣漁舟嚮導來

氣候

少寒多煥不霜天木葉長青花久好菓箇四時皆似夏荷
花度臘菊迎年

七夕

露重風輕七夕涼魁星高譙其稱觴幽窗還聽囁語花
采香燈視七娘七夕家家設牲醴果品花粉之屬夜向簾
前祭緣視七娘壽或曰魁星于是日生上

子為魁星會竟夕
歡飲村壑九盛

中秋

碧天雲淨水烟微砧杵無聲一鏡飛書餅香中人盡醉端
娥親見奪元歸中秋夜土子飲博達旦製大餅以象月
書元字擲四紅者得之取秋闈佳兆也

牛車

短朝高箱服兩牛柴車輓運健於舟五更殘月夢初醒角
韻嗚嗚生客愁

北香湖

十頃紅雲貼水鋪藕花深處亂風鳥北風涼動香逾好得
似西湖六月無

蓮花潭

蓮瓣芹絲一氣香天然泮水繞官牆林端不許飛鷗集山
勢高騫拱鳳凰

澄臺

澄臺上下樹婆娑滿目殘陽動遠波天水無垠同一碧風
帆如葉鳥如螺

番俗

包練衣衫最麗都換年風景野花散金盞慶舉首新鞋裏答
答偏宜賓也珠

競誇麻達好腰圍健足凌空幾似飛是時鼓金鑼聲近遠輕
塵一道走差歸

爭迎使節其歡呼駿馬前頭眾婦趨首頂盤盤陳野食大

官會未識都都

鵝筒慣寫紅夷字默音能通先聖書何物兒童真拔俗琅
琅音韻誦關雎

藤毯舞罷舞鞦韆世外嬉怡別有天月幾回圓禾幾熟歲
時頻換不知年

促個山深惡木稠穿林如虎攫人頭羣蠻社裏誰雄長茅
宇新添金霸樓

雨後和張侍御韻

巡臺給書山滿州人

霖霖郊原四月申交暮木碧虎年豐衙齋分韻呈星使
屋祈年頌雨工解澤已聞沾處處重雲猶爲羨九芘長吟
霽清飛甘句樂意相關爾我同

勸農歸路經海會寺與諸同人分賦

勸農親民事歸途逸興同
地高溪翠合林菁妙香通
喜得千村雨開來一畝宮
寸心荷半渴頓覺海天空

荷齋秋興

秋半猶炎熱中庭艸木香
片雲天淺碧涼葉掃輕黃
不厭蟲鳴急還食竹影涼
人歸夕事少無睡夜初長

山棲

王之敬興化人

松竹逕從幽壑轉
茅茨門面亂山圍
時聞好鳥林間語
更有鳴泉檻外來

萬仞巉巖插碧峰
當窗雲積碧叢叢
夕陽西下湖光白
一棹歌聲釣晚風

秋容如沐淡襟懷
野老相逢笑口開
遙指夕陽紅映處
山樓閣似蓬萊

番俗

鄭宵連江人

混沌初開似葛屨
人開甲子欠安機
墮瀟望杏占農候
一箇幽風却不差

蓬頭跣足露襟尻
尺布纏腰結束衰
總髮莫嫌藤屨陋
髮全在插雞毛

三月芳菲唱踏歌
魚龍人海競婆娑
龍中也有周郎顧
足推頭說甚麼

素問空傳肘後經
山中無後屨參苓
河流滴滴楊枝水
盡畚兒骨髓腥

灌既無煩土賦饒經經播種不耘南登場一歲支三歲
上屯田十二條

詠偽鄭遺事四首

陳昂 侯官人

戰初旋師返北轅傳教旋海關乾坤成功金慶敗還瓜

負負負債走履陳臺壽可取狀諸將以金多舊借牛皮

地初紅夷借地于倭日但得地大如牛皮多金不惜倭

不歸全歸臺地南水漲新通鹿耳門鹿耳門港道紆折沙

紅彝援絕竟移屯何緣自比虬髯客豈昧幾先讓太原

共報招撫書 白比張仲堅

片石能容百萬人天道國無應雨國初臺灣石中識云風

人五百年後也知中國全歸漢妻託仙源可避秦荒島禽

田登版籍土首耆族雜流民開荒絕勝田橫島易世相傳

尚不臣

荒遠羈棲幸弗誅敢通叛逆約齊驅耿逆變後使人漫勞

蝸戰爭天下先自鯨吞奪海隅經統借漳泉二郡為召募

息三載相持誰得利兩雄交構待全輸彼蒼藉手平南紀

曠古新增一統圖

昔年亡將濟時才成功率兵時施襄壯年最少仰仗威靈

涉險來地轉海鹹生淡水澎水故多鹽故我師雲集天回

風颶起奔雷六月申常有颶是日將颶有風從西北來土

官軍血戰滄波沸逆虜魂銷劫火灰燒偽二漢隳全敗

三十六受降澎島戟門開

秋夜

監生 林元俊 同安人

西風瑟瑟夜淒涼何事縈心旅夢長
蛩韻初秋吟遠砌螢燈帶月照高梁
傾觴自許三更醉對菊頰分一段香
最厭隣家砧杵急聲聲盡是搗愁腸

蝴蝶花

太學生 王洪 龍溪人

不識波羅國爭看蝴蝶花吐絲多
已露晨趨各矜華最喜秋陽映應須
錦帳遮風飄仙客醉窗外影橫斜

朱文公祠梅花

陳中丞清端公手植

王聯登 泉州人

海外遺簷笑幾回南枝開盡北枝開
參差遺蹟非無意知是風流太守來

吟落風塵漫自輕春來占斷自分明
廣平賦就成作話鐵石心腸更有情

海濱聊作美人家醉後更闌月影斜
惱得詩人緣底事請君試看典型花

乘興尋芳共舉樽羅浮花下醉黃昏
夕陽掩映佳人影莫認亭亭倩女魂

溪上

生員 陳斗南 臺灣

一灣春水繞人家兩岼餘波濺碧沙
咫尺烟津虛過客浮沉古木欲棲鴉
雲封遠岫千層渺艸長荒田一望賒
共訪仙源何處是隔溪依約有桃花

登龜山絕頂

攀蘿捫石上層巒野曠天遙一望寬海送潮音如欲兩山
含樹色暫生寒花宮清做遊人集艸徑紫紆去路難咫尺
蛇峰餘故壘蕭蕭烟景正貪看

遊大奎壁淨度庵

黃龍白馬現今朝頻訪山僧不憚遙卓錫時聞翔鶴響譚
經惟見雨花飄寒園病叟空泉甕小市歸人只木橋萍水
與師成夙契傾心獨許遠公招

走珠莊

不到山莊又隔年近來雙嶺集人烟蘆花缺處疑爲路溝
水流時足灌田歲晏歌鍾崇臘祭天寒老釋負朝妍行程
莫厭沙洲遠山疊溪頭繫釣船

白鷗塘雜詠

暫免征途苦于今百慮疎名山隨我看濁水任人漁風雨
三春暮鶯花一望舒瞻雲時有意何處遣雙魚

看山宜曉起萬壘最分明日帶雲中色風餘樹杪聲新畬
聞布穀古竹話流鶯極目烟波際蒼茫積翠橫

猛雨連三口溪聲屋後饒沙堤窓外滑烟樹望中遙茅舍
依高岫銀泉落小橋泥濘何處客歸路正迢迢

萬水何西注

斗六門之水皆西流

潺湲晝夜聞荒林橫宿霧遠岫夾

層雲沐鷺無人管飛鴉偶自羣忽看魚艇入款乃聽紛紛

初夏讌集

歲貢生

周日燦

蕭墨人

日月無停軌芳時最難留人生當爲歡懽懽復焉求幸有

芳樽在曠然滌繁憂薰風被廣陌蘭蕙散林邱鳧鷖何處
來啜啜鳴沙洲嘆我羽翼短飄飄莫與儔長歌滄海外知
我共綢繆

暮春

附生 葉泮英 臺灣

春風淡蕩柳條輕半老山花半老鶯遲日滿簾飛絮亂不
堪腸斷是清明

鳳仙花

道是仙家卉亭亭向座隅纔驚花綴鳳翻見葉凝珠色送
秋容好烟浮暮靄數隣家小兒女纖手愛塗朱

老來嬌

不是名花作意紅老來顏色傲春風幾回側倚欄杆立錯

認珊瑚出漢宮

龍潭夜月

月皎寒潭清夜深秋露白驪龍自在眠雲影蕩天碧

屏山夕照

峭壁蒙茸綠天然列書屏夕陽殘照裏添得十分青

白鷗塘雜詠

暫免征途苦于今百慮疎
名山隨我看濁水任人亂風雨
三春暮鶯花一望舒
瞻雲時有意何處遣雙魚

看山宜曉起萬疊最分明
日帶雲中色風餘樹杪聲
新禽聞布穀古竹話流鶯
極目烟波際蒼茫積翠橫

猛雨連三日溪聲屋後饒
沙堤窻外滑烟樹望中遙
茅舍依高岸銀泉落小橋
泥濘何處客歸路正迢迢

萬水何西注斗六門之水皆西流
潺湲晝夜聞荒林橫宿霧
遠岫夾層雲沐鷺無人管
飛鴉偶自羣忽看魚艇入
欵乃聽紛紛

初夏讌集

歲貢生 周月燦 諸人

日月無停軌芳時最難留
人生當為歡懺懺復焉求
幸有

芳樽在曠然滌繁憂薰風被廣陌蘭芷散林邱鳶何處
來唼唼鳴沙洲嘆我羽翼短飄飄莫與儔長歌滄海外知
我共綢繆

暮春

附生 葉泮英 臺灣

春風淡蕩柳條輕半老山花半老鶯遲日滿簾飛絮漁不
堪腸斷是清明

鳳仙花

道是仙家卉亭亭向座隅纔驚花綴鳳翻見藥凝珠色逞
秋容好烟浮暮靄敷隣家小兒女纖手愛塗朱

老來嬌

不是名花作意紅老來顏色傲春風幾回側倚欄杆立錯

認珊瑚出漢宮

龍潭夜月

月皎寒潭清夜深秋露白驪龍自在眠雲影蕩天碧

屏山夕照

峭壁蒙茸綠天然列畫屏夕陽殘照裏添得十分青

續脩臺灣府志卷二十四終

天勝既高長... 湖廣無異... 十... 青

... 湖廣無異... 十... 青

...



